

# Marcohacha laenai

## Ena Nenea Cana Coaunera Ere

---

### Cana Coaunera ere beebejiha Joaan Baotisitane

(Mt 3.1-12; Lc 3.1-9, 15-17; Jn 1.19-28)

**1** <sup>1</sup>Caate nunuhe caje coauneein Cana Coaunera Calaohi Jesocurisito que erena raotono ne. <sup>2-3</sup>Niite inoaenlu nere bera inoaensi Isaihasi que berateein laenaratiha Cana Coaunerane jaun, nii aitothane rijitjoeiein:

“Nii Canuhacha letoai

Canu ere berate,

ii ajiniha cuhin turuhine jaan

bero rucuhereein.

Nitohaniane jaunte:

‘Cana Curuaanaa turunajaanu  
bero raujiaauche,’ naain cacha  
areroo rohan situnacaauru  
cotijiaain suujuatereein,”

naain nere bera inoaensi Isaihasi que berateein laenaratiha Cana Coaunera

<sup>4</sup>Nii rijijieein jetaote chuhsi, inae cacha areroo cachaauru baotisaain:

“Inara osa jianein, esinae rauhijiriin Cana Coaunera coitucuhin nacoauneein inara ichao coreein neeichene cojunacanein acauhanau teein baotisanajoinein neeichene inara osa caje inara ichoteratemiin Cana Coaunera,” naain belu jetao acaauru rai Joaan. <sup>5</sup>Nii jana jetaote, satiin Jodea batane que nenacaauru aina Jerosaleeun

nenacaauru naonjoainuri nii Joaan ere aonaa curejetecurelu.

Nitohanein cuhin ecu turuhin esinae rauhijiriin suujelanaala osaocuruhane beeuruhane jaun jetao, nucuhe Jorodaan cuhane teein acaauru cojunacatiha acaauru baotisarejete nii Joaan.

<sup>6</sup>Camecho ujui caje ichanohin cajione que cajionequin jetaote, jacari caje ichanohi que ichoraquiin, sisiincho, irichaje, naonjoainuri que jetao lenonein nerejetelu nii Joaan.

<sup>7</sup>Nitohanein jetaote, Cana Coaunera ere beebejeein jetao:

“Canu baihate ureein leinjiin jataain canu amurijiriin nelateein nenea. Niheichu rai safato ichora rutuhanune coina nihanatiin nelatejeerinaauni.

<sup>8</sup>Canune acau que inara camujuaain inara baotisaan. Jana acate laen inara baotisaan ureein Cana Coaunera Suujue que,” nae jetao cachaauru rai Joaan.

### Jesoso baotisaan Joanne

(Mt 3.13-17; Lc 3.21-22)

<sup>9</sup>Nii cojoanona bana jetaote, Calileea batane que nenea Nasarete caje amuhin, nucuhe Jorodaan auhaniha turuha Jesusone jana jetao, ecu Jorodaan cuhane teein acaentonai camujuaain baotisaan Joaan. <sup>10</sup>Nii baotisaan Joane

jana acau caje mituhane rijieeoritiin dede coaraa Jesusone jana jetaote, neyoracaa dede bacuujuane jana caje uhin serori rijijieein nichoae fauha uhe Cana Coaunera Suujue. <sup>11</sup>Nii jana dedeeu tonii jetaote:

“Ii te jataain canuhacha jereein canuhacha cocoainanohin cacalabineein neeicha,” naain toniha erenaane jana jetao aonajeure.

**Baaso que Jesuso saruha Moconajaerane**  
(Mt 4.1-11; Lc 4.1-13)

<sup>12</sup>Nii baiha jetaote, cacha nenaja nihei que Jesuso amae Cana Coaunera Suujue. <sup>13</sup>Nii jaun ucuae ataibinaecuru jana niha jena chonca janohin Cana Coaunera Calaohi Jesusone jana jetaote, baaso que saruhane coina cojuhuh coaraa moconajaerane jana jetao, Jesuso coroatajanecure Cana Coaunera letonocuru anjeraauru.

**Calileea batane kuhin,**  
**rai namihaneeo nunuhetiha Jesusone**  
(Mt 4.12-17; Lc 4.14-15)

<sup>14</sup>Inae caresero kuhane Joaan enoaauruhane baiha jetaote, Calileea batane que cue Jesuso, Cana Coaunera ere Erenaa Raotono que ereerejeein cachaauru rai bihane coina.

Nitohaneein inae ecu turuhin jetaote: <sup>15</sup>“Inae ichuunijiha Cana Coaunera Cojoanonaa. Aihane jaun Cana Coauneraacha beratenojoin Erenaa Raotono esenetaain tonoraauche,” naain beebeje cachaauru rai Jesuso.

**Jenai cachaauru ate mucuurer**  
**cotihaca Jesusone**  
(Mt 4.18-22; Lc 5.1-11)

<sup>16</sup>Nii jana jetaote, Calileea conemuri auhanaha cuujihane jaun jetao, coroatajai ate mucueracuru Simoon, chaen nejera Aanderesi, naaonjoainuri

coarae Jesuso, acauhanau rai rede nalaacuruhane jana. Nitohaneein acauru coaraain jetaote: <sup>17</sup>“Chajaauche canu aina. Aihate nii ate mucuhichene rijijieein, canu rai cachaauru mucuhin raeraneein neeiche,” nae jetao acauru rai Jesuso.

<sup>18</sup>Nii rijieeoritiin jetaote, rai rede ratiriin Jesuso aina cuure.

<sup>19</sup>Nii caje basiinjiin cutiin jetaote, coroatajai ate mucuurer- Sebedeeo calaohichuru Saantiaao aina rai nejera Joaan eruha cue Jesuso, bote kuhane neein redeeuru rucuhaca neeuruhane jana. <sup>20</sup>Nii coaranaacane rijijieeoritiin cotihanaacane jaun jetaote, bote kuhane acauru coroatajaneraauru aina nii acauru inaca Sebedeeo ratiriin Jesuso aina cuure.

**Leinjiin cacha suujua kuhane niha**  
**Moconajaera letonone**  
(Lc 4.31-37)

<sup>21</sup>Inae Caferenaon turuhin jetaote, nebetacanaa cojoanonaa bana ita taojiaain, Cana Coaunera rai rauhi que ereerecuruha Joriocurune jaan coloheri sinacoca asaa kuhin cachaauru relaane nunuhetiha cue Jesuso. <sup>22</sup>Nii jana jetaote, cojoaelatiin aonajeure cachaauru, Moisesa aitonjoan rauhi que cacha relaurera amurijiriin esinae rauhijiriin suujua caje coitucuhin aitohane jaun.

<sup>23</sup>Nii jana jetaote, nii netaojiaauruha cachaaurune jaan coloheri sinacoca asaa ne leinjiin cacha- suujua kuhane Moconajaera letono siricha. <sup>24</sup>Ac jetaote ehequiin:

“Chanute cacanaanu rene turuha uhita Nasarete cocoaicha Jesuso. Jerihane nechuh jataain cacanaanu itajeranu quete turuha uhicha. Raotojoeinne canu, ii Cana Coaunera Calaohi neeine coitucunra,” nae Jesuso rai. <sup>25</sup>Nii jana jetaote:

“Coa iriha. Caa cacha jianein amuura,” nae jetao Jesoso, nii cacha suujua cuhane nenea Moconajaera letono rai. <sup>26</sup>Nii jana jetaote, rijijijianein nii cacha teein, tonijiaain ehequiin mitue nii Moconajaera letono, nii cacha suujua caje. <sup>27</sup>Nii jana satiin nesoonetiin jetaote:

“Chatohanai cacha relaera cachana caa ai. Coatiha cacha relaauruha cacha relaaurerane rijijieein cacha relai. Caate laen nohanelanaala esinae rauhijiriin cacha relae. Chaen techu moconajaera letonocuru nihanatiin nere tonoraain cacha suujua caje mituhin amuure,” naain jetao ita caje bajaure nii cachaauru.

<sup>28</sup>Nii jana jetaote, coa carajaeriin Jesoso benaa coitucure satiin Calileea batane que nenacaauru cachaauru.

**Simoon Fedoro tano rautaa Jesusone**  
(Mt 8.14-15; Lc 4.38-39)

<sup>29</sup>Inae netaojiaain Cana Coanera rai rauhi que ereerecuruha Jorioocurune jaan coloheri sinacoca caje mituhin jetaote, Saantiaao, Joaan, naaonjoanuri aina jiniiquiin, Anderesi aina Simoon loreri asaae cue Jesoso. <sup>30</sup>Nii jana jetaote, inae nii loreri asaae turuuruhane jana, ajaa caaun cunaiteein ecu tocoeque Simoon tano. Nii jaun jetaote, Jesoso rai beeuruhane jaun, <sup>31</sup>rohan nichuuntaain rai biji que michuhane jana jetao, inae caje amue ajaa. Nii rijieoritiin inae caje amuha ajaane jaun jetaote, nimichuhin acaauru coroaate nii cunaitenaa Simoon tano.

**Arajiin cunaitenacaauru rautaa Jesusone**  
(Mt 8.16-17; Lc 4.40-41)

<sup>32</sup>Inae sohane jaun nocohecane jana jetaote, Jesoso rene satiin cunaitenacaauru, chaen suujua cuhane Moconajaera letono sirichauru, naaonjoanuri

cachaaurune maajein amaaure, acaauru rautaa Jesusone caina. <sup>33</sup>Nii jaun jetaote, satiin nenaanajaauru caje cuhin, ecu acuujuu niha netaojiaaure cachaauru. <sup>34</sup>Nitohanein jetaote, araii laurii cunai caaun cunaitenacaauru cachaauru rautaaain, Moconajaera letono sirichaurune maajein rautae Jesoso. Nejetaote laen ereeuruha nii cacha suujua cuhane nenacaauru Moconajaera letonocurune caohate Jesoso, raotojoein acanhane coitucuruhane jaun.

**Calileea batane cuhin,**  
**Cana Coanera ere beebejiha Jesusone**  
(Lc 4.42-44)

<sup>35</sup>Inae janonaa jerihane jaun jetaote, nimichuhin nii nese caje cuhin, jelai Cana Coanera bajaa cue Jesoso. <sup>36</sup>Nii jaun jetaote, leeochoauru aina jiniiquiin cuhin Jesoso ariha cue Simoon. <sup>37</sup>Eruhin jetaote:

“Satiin cachaaurute ii ariirijia amuhemuhecuru,” naauruha Jesoso raine jaun jetaote:

<sup>38</sup>“Chajaa chachuchete ichuun nenacaauru leeochoa nenanajaauru cuhin Cana Coaneraacha beratenojoin erenaa benichaache. Nii coinane jelai caje mituhin cajiha uun,” naain acaauru tonorae Jesoso.

<sup>39</sup>Nitohanein jetaote, cajihaanein nenaanajaauru amuhemujueein, satiin Calileea batane sacuritaain Joriocuru rai netaojiaauruhane jaan coloheriuru asaae Cana Coanera ere beebejein, moconajaera letonocuru sirichauru cachaaurune maajein rautaaain amuhemujue Jesoso.

**Leinjiin cosibi siricha rautaa Jesusone**  
(Mt 8.1-4; Lc 5.12-16)

<sup>40</sup>Nii jana jetaote, Jesoso rene turuhin jetao: “Jereine jana nihane canu

rautaai caa canu cosibi caje,” naa leinjiin cacha cosibi caaun cunaitenaa, nacatiha neseeonrihaainne jaun jetaote,

<sup>41</sup>cairichaaajoaain coaraane jaun jetao, biji que mucuhin:

“Jerichaaun chujian. Ii caje amuhine caa ii cosibi,” naa nii cacha rai Jesusone <sup>42</sup>rijieeoritiin caje amuha nii cosibine jaun jetaote, inae somaraain ne nii cacha. <sup>43-44</sup>Nii nerataane rijieeoritiin rai necoein jetaote:

“Aonaun. Coa caa ii rautaanune biha chuni rai. Raujiaain Cana Coaunera ere que cacha relaera neein nenea saseredote coaanihun ii coaraane coina. Chaen inae nerautaa nii ii cosibi cajene coaracuruhane coina, aitoha Moisesa aitonjoan rauhine rijijieein, Cana Coaunera belaaone jaanu amaain cunihute inae ii cosibi caje nerautaaone coitucuumiiniin satiiin cachaauru,” naain jetao jataain suujuatein nii cacha letoae Jesuso. <sup>45</sup>Nii jana jetaote, satiiin cachaauru rai nii nitohanein jaberoco rautaa Jesusone que nereretaa cue nii cacha. Nii jaun jetaote, inae neseeu ru raotojoein turunaa nainenihane jaun jetao, neniha cachane jaaun cuhin amuhemujue Jesuso. Nejetaote, lauri laurichuru caje cuhin coaraa cuure cachaauru.

**Leinjiin jiuirona cacha rautaa Jesusone**  
(Mt 9.1-8; Lc 5.17-26)

**2** <sup>1-2</sup>Nii baiha janojanoheriin catiaain jetaote, coaiten Caferenaan cue Jesuso. Inae ecu turuhin, loreri asaae nihane coitucuhin jetaote, rene turuha cuuruha arajii cachaaurune jana jetao, acaauru rai Cana Coaunera ere beebje Jesuso. Nitohanein arajiiin turuuruha cachaaurune jaun jetaote, jataain nemoha loreri asajine jaun, nii acuuju rohan nihanatiin nene turuha cachane jaannu. <sup>3</sup>Nii jana jetaote, Jesuso rene

leinjiin cacha jiuirona amaare jenai cachaauru. <sup>4</sup>Nejetaote, jataain arajiiin turuha cachane jaun, Jesuso rene nii jiuirona cacha turuanaa nainecure-nihana jaun jetao, loreri coarana joaracaain rai nela cuhane tijichaaain, nii niha Jesusone jaan jelon nii jiuirona cacha faaure. <sup>5</sup>Nii cunaitenaa rautari-chaaanne esenetaain amauruha nii amaaurerane coaraane jaun jetaote:

“Inae ii osa caje ii ichoteratein, ii que casuuju aacatchaaunra cacalabi,” nae jetao nii cunaitenaa rai Jesuso.

<sup>6-7</sup>Nii jana ecu neein aonajeein jetaote: “Chanuna caritiin ere caa cacha. Nechu jataain Cana Coaunera niha nocoetohane jaunte aite. Leinjiin Cana Coauneraachate nainere osa sitaa cacha cajene,” naain jetao suuju cuhane ereerejeein lauruju laurujuuain aonajeeure Moisesa aitoonjoan que cacha relaaureerauru tabaauru. <sup>8</sup>Niritiin suuju cuhane coaacuruhane que nainaaain jetaote:

“Chanuna niritiin inara suuju cuhane coaaquiche. <sup>9</sup>Cha caaintanerihaa nii jiuirona rai: ‘Inae ii osa caje ichoterate-nojoein,’ naain irihaca ne. Ainihane: ‘Nimichuhin chela seriin amuu,’ naacane. <sup>10</sup>Coarajeeuchenejian, Cana Coaunera Calaohi cachanein nejanoanaa nichaaunne, itolere curuaanaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiuirona rai:

<sup>11</sup>“Ii raine aitoon. Nimichuhin chela seriin chenenajau caunihu,” naa Jesusone rijieeoritiin jetaote, <sup>12</sup>satiiin nii ecu neein coarajeeurera notaracae jetao, nimichuhin rai nela seriin jelai caje amue nii jiuro caaun cunaitenaa. Nii jaun jetaote, satiiin cojoelatiin jetao: “Chabana catohani coarahaacacheta,”

naain jetao Cana Coaunera coroaecure cachaauru.

**Leinjiin cacha Lebi cotihaca Jesosone**  
(Mt 9.9-13; Lc 5.27-32)

<sup>13</sup>Nii baiha jetaote, coaiten nemuri auhaniha cuha Jesosone jana, rene tururuha arajiin cachaaurune jaun jetao, acaauru rai Cana Coaunera ere bebejeein acaauru relae Jesoso. <sup>14</sup>Nii caje cujueein jetaote, Romanocuru rai *impoestonu* que cacha cobaraain coriqui raeraneein nihane jaun rai rori ichoae lauhecoha Arafeeo calaohi Lebine jana coariin jetao:

“Chajaau caniha,” naa Jesosone jaun jetao, nii rijieeoritiin nimichuhin Jesoso aina cue Lebi. <sup>15</sup>Nii baiha jetaote, nii Lebi loreri asae lenoniha niha aina nerelanacaauru aina Jesosone jana jetao, cuu nii Lebi aina lenoniha neeure arajiin leeochoaauru Romanocuru rai *impoestonu* que cacha cobaraain coriqui raaurera, leeochoaauru cachaauru-baasoneein ichaoha benojoihunri, naaonjoainuri. <sup>16</sup>Nitohaneein Jesoso aina lenoniha neeuruha nii nitohaneein ichaonacaauru cachaaurune coaracurhane jaun jetaote, nii Jesoso aina nerelanacaauru rai jetao:

“Chasiina taa Romanocuru rai *impoestonu* que cacha cobaraain coriqui raaurera, baasoneein ichaoha benojoihunri, naaonjoaihunri aina lenone inara relaera,” naaure jetao fariseeocuru aina Moisesa aitoonjoan que cacha relaaurera, Jesoso aina nerelanacaauru rai.

<sup>17</sup>Nii jana jetaote, acaauru aonajejin jetao:

“Coatiha coichaera latecuruhi rauronacaauru. Leinjiin cunaitenacaauruhachate coichaera latecure. Coatiha osa colane nenacaauru cotihaca uhaaun. Osa aina nenacaaurune cotihaca uun,” naain jetao acaauru tonorae Jesoso.

**Suri couu netiin Cana Coaunera**  
**bajaauruhane**  
(Mt 9.14-17; Lc 5.33-39)

<sup>18</sup>Joan Baotisita sacuurera aina fariseeocuru sacuurera jetaote niqiu, suri couu netiin Cana Coaunera bajaebajaecure. Nii jana jetaote, Jesoso rene turuhin jetao:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaee bajaecure suri couu netiin. Nete laen itolere bana ii aina nerelanacaauru, coaerai cohin, lenoneein, naaonjoaunreta,” naauruha Jesoso raine jana jetaote:

<sup>19</sup>“Aiha chuhisi niqiu. Nete ene ranaa jeriha cachana jaa beseta que neeuruhan jaun, suri couu nena nainecurene caa cotihanohinchuru, jaiti acaauru aina niha nii ene raeranu cachane jaun. <sup>20</sup>Nete laen inae nii ene ranaa jerera cacha amaauruhane, suri couu neein inaderaa cuurureeinha,” naain jetao: <sup>21</sup>“Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soailhanete, nii obiri enachasine asaere nii cajione siri. Chaen caohachaain nedanaa naineriheii nii obiri enachasine, nii cajione siri que couneraane. <sup>22</sup>Nii rijijieein chu, nihei chuni inae conaca que tiha coaeraine jana, cuhane ichonai tera. Nitohaneein cuhane teraa ichonainete naasaere nii coaerati. Nitohanihane jaunte, caohachae coaerai nejesinaneein niha coaeraine. Chaen ichonai, ichonai nejesinajejin nihane caohachae,” naain jetao cachaauru tonorae Jesoso.

**Nebetacanaa cojoanonaa bana aroso**  
**rijijieein nena tirico moloonejejin**  
**quihuruha Jesoso aina nerelanacaaurune**  
(Mt 12.1-8; Lc 6.1-5)

<sup>23</sup>Nebetacanaa cojoanonaa bana aina nerelanacaauru aina jiniiquuin temule jana situhin, amuhemuheca Jesosone jana jetaote, quihuruhane coina aroso



coaracuruhane jetao, nacatiha neseeon-  
riaain:

“Iite Cana Coaunera Calaohi neeicha,”  
naain jetao cojiorichure.

<sup>12</sup>Nejetaote aonajeuruha cachaaurune  
jana, que ereeuruha nii moconajaera  
letonocurune caohate jataain Jesoso.

**Afosotoorunu que, lechoonca coroatajai  
niicha cocoainanenu janiicha Jesosone**  
(Mt 10.1-4; Lc 6.12-16)

<sup>13-14</sup>Nii baiha jetaote, ichtatane ucuuno  
que iniin caohachaaain niicha coaracuri  
cotijiae Jesoso. Inae satiin netaojiaa-  
ruhane jana jetaote, janiinjaain  
acaauru caje lechoonca coroatajaain  
nenacaauru cocoainae, corihaneein  
jiniichaaain amuhemujein, chaen nere  
beraanu que naaonjoaaunruhane coina.  
Nii lechoonca coroatajai niicha  
cocoainaaauri jetaote, afosotoorunein  
curuaatenajaain letoanajaen, <sup>15</sup>cache  
suujua cuhane nenacaauru moconajaera  
letonocuru sitaain, cunaitenacaaurune  
maajein rautaauruhane coina. <sup>16</sup>Nii  
lechoonca coroatajaain niicha janiichuri  
jetaote, nii jauriaanejein Simoonnein  
niicha curuaatei Fedoro, chaen <sup>17</sup>nejera  
Joan aina Sebedeeo calaohichuru  
Saantiaao naaonjoainurine. Acaauru  
jetaote, Boanerges neein curuaatenajae:  
“Arara calaohichuru,” naanenein.  
<sup>18</sup>Chaen Aanderesi, Ferifi, Bartolomee,  
Mateeo, Tomasi, Arafeeo calaochi  
Saantiaao, Tadeeo, Celotenein niicha  
curuaatei- Simoon, <sup>19</sup>chaen nii acaauru  
lechoonca coroataja, Jesoso colurujue-  
ranu Jodasi Isacariote naaonjoainurine.

**Moconajaera letononiha Jesoso  
beuruha Moisesa aitoonjoan  
que cache relaaurerane**  
(Mt 12.22-32; Lc 11.14-23; 12.10)

<sup>20</sup>Nii baiha jetaote, leinjiin loreri  
asaae enoha cuha Jesosone jana jetao,

ecu rene arajiin netaojiaauruha  
cachaaurune jaun jetao, nii aina  
nerelanacaauru aina jiniiquiin lenonena  
nainecurene. <sup>21</sup>Inae nitohaneein ecu  
niicha ichanenu coitucuelanaala niha  
Jesosone beeuruhane coitucuuruhane  
jaun jetaote, raa cuure naraaichuru.

<sup>22</sup>Chaen Jerosaleen caje turunacaauru  
Moisesa aitoonjoan que cache  
relaaurerane netonai jetaote,

“Moconajaeracuru curuaanaa  
Beelseboote, caa cache rai catohanei  
ichaane jaan teein ne, nii aina cache  
suujua cuhane nena moconajaeracuru  
letono sitaane coina,” naaure jetao ita  
rai.

<sup>23</sup>Niritocuruhane aonaain jetaote,  
acaauru cotijiaain:

“Chasiina nejesinanejein, chatoha-  
neein ita teein, ita sitanaa nainere  
moconajaera. <sup>24</sup>Niheichu leinjiin atane  
que ichaonacaauru, nejesinanejein itaque  
nejeratein nihane raotiin ita aina  
ichaonaa nainecururihei. <sup>25</sup>Niheichu  
leinjiin loreri asaei ita que nejesinanejein  
nejeratein nena nainecuruhi  
coroatajai cache, lesajein ita que  
nejeratein nihane raotiin ita aina  
ichaonaa nainecurenihane jaun. <sup>26</sup>Nii  
rijijieeinchu ita que nejesinanejein  
nejeratein nena nainecuruhi mocona-  
jaera aina rai letonocuru, enaacha  
jiniiquiin ita itajenaa nainecururihane  
jaun.

<sup>27</sup>Nihei chunei jataain laraajiin nena  
cache loreri asaae enohin niicha sirii  
rulunaa nainera. Jauriaanejein biji  
ichohacane banaachate nainere caje  
niicha sirii ruluhane.

<sup>28</sup>Cana Coaunerate, itolere baaso  
ichaain neosatein, itolere baaso que  
ereein naaonjoaaunruha cachaaurune  
niha natiin acaauru que suujua acatein  
ne. <sup>29</sup>Nete laen rai Suujue que  
baasoneein iriha cachane, chabana que

Suujua acatenereein Cana Coaunera. Nii cacha baasoneein que ereite chabana satonoelanaala caseteconihia cureein,” nae jetao Moisesa aitoonjoan que cacha relaaurera rai Jesoso. <sup>30</sup>Moconajaera letono sirihia beeuruhane jaun jetaote, acaauru rai aite Jesoso.

**Neba aina turuuruha Jesoso nejeraaurune**  
(Mt 12.46-50; Lc 8.19-21)

<sup>31</sup>Nii jana jetaote, turuha uure neba aina Jesoso nejeraauru. Nejetaote loreri asae enoelanaala, airiniha neein cotiharateeure. <sup>32</sup>Nii jana jetaote, nii Jesoso curuhacaain nenacaauru cachaauru jetao: “Taute airiniha turuhin ii ariiriichure ii neba aina ii nejeraauru aina ii baihuru,” naauruha raine jana jetaote:

<sup>33</sup>“Charijina canu neba, canu nejeraauru, naaonjoainere,” naane baiha jetao, <sup>34</sup>nii curuhacaain nenacaauru cachaauru coaraain jetao: “Caaurute canu neba, canu nejeraauru, canu baihuru, naaonjoainuri ne. <sup>35</sup>Chunocoha jeriha Cana Coaunerane rijijieein ichaohin, Cana Coaunera jerenohin icharate, canu neba, canu nejera, canu bai, naaonjoainurine,” nae jetao acaauru rai Jesoso.

**Ucuhe riaara que cuaain  
cacha relaa Jesusone**  
(Mt 13.1-9; Lc 8.4-8)

**4** <sup>1</sup>Nii baiha nacoaauneein nemuri auha niha teein cachaauru relaa Jesusone jana jetaote, ecu arajiin netaojiaauruha cachaaurune jana, nii nemuri cuhane niha leinjiin botene jaun jetao, cuhane fauhin nelauriariin lauheque Jesoso, nemuri auhaniha neein coarajeeuruha cachaaurune jana. <sup>2</sup>Nitohaneein bote cuhane fauhin jetaote, ecu neein aonajeeuruhane jana araa laurii itolereeuru que cuaain

acaauru relae. <sup>3</sup>Nitohaneein acaauru relaa in jetaote:

“Caohachaain caa quere aonacuche. <sup>4</sup>Leinjiin cacha, ucuhe riaacane jana tabaauru bero cuhane nalunacaaurute turuhin quihure tajaecuru. <sup>5</sup>Jana tabaauru jataain neniha atane jioonone jaun samaata choae nalunacaaurute erojoein omaroe, ucuacaain neniha atane jioonone jaun. <sup>6</sup>Nete enoto ajaano caun, neniha chojoaisine jaun ohe nii omarona. <sup>7</sup>Jana tabaauru ucuhecuro, ojoa jana nalunacaaurute omarohane saijjieein amurijiriin omarohin soha ojoane jaun, inacae lanaala ohacoae. <sup>8</sup>Jana tabaauru ucuhecuro atane caohacha choae nalunacaaurute omarohin caohachaain inaacane jaun, le ucuhecuro caje tabaauru nichata choonca ucujeein, saota choonca ucuheneein, le fasha ucuheneechuru inacae,” naain acaauru relaa in jetaote: <sup>9</sup>“Caohachaain aonacurumiin urichonacaauru,” nae jetao acaauru rai Jesoso.

**Acaauru relaa Jesusone jaan bajaauruha  
caje aina nerelanacaaurune**  
(Mt 13.10-17; Lc 8.9-10)

<sup>10</sup>Inae caje amuuruha nii cachaaurune jana, jelai nedaa Jesusone jana jetaote, nii cachaauru relaane jaan bajaure caje, nii lechoonca corotajaain aina nerelanacaauru aina ecu rohan nenacaauru leeochoauru cachaauru, coitucuuruhane coina. <sup>11</sup>Nii jana jetaote, acaauru rai: “Inara quete asinojoneein nena rai Cojoanonaa coitucuerate Cana Coaunera. Nete laen rai cachane lanaala nenacaauru que, nereretanaa que cuaain acaauru rai be, <sup>12</sup>coaracuruha neniha natiin coitucurenihane coina. Niheichu aonacuruhane niha natiin, coitucuuruhane coataa. Nabana aonaain aina cuaain esenetaauruhane, acaauru osa acaauru ichoterateein acaauru que suujua acatiha Cana



Coaunerane coataa,” nae jetao acaauru rai Jesoso.

**Ucuhe riaara que acaauru relaane  
jaan coitucueratiha Jesosone**  
(Mt 13.18-23; Lc 8.11-15)

<sup>13</sup>Niritiin jetaote, aina nerelanacaauru rai jetao: “Ta caa inara relaanune jaan aonaain coitucuhichene. Chatohaneeina jana leeochoaauru que cuaain inara relaanune coitucuriquiche. <sup>14</sup>Nii ucuhe riarate Cana Coaunera ere bera rijjijeein ainaa ne.

<sup>15</sup>Niha nii coina tabaauru tabaauru nii bero cuhane naluhin nitajenaa ucuhe rijjijeein nenacaauru cachaauru. Nii coinata Cana Coauneraacha beratenojoin aonacuruhane niha natiin, inae acaauru coritaa uha moconajaerane acaacha esenetaain, inae suujua cuhane Cana Coaunera coaacuruhane jianecure.

<sup>16</sup>Nii leeocho cachaaurute, nii samaata choae nalunaa ucuhe rijjichure. Nii jaunte Cana Coaunera beratenojoin jereein rautaaain aonacuruhane baiha, <sup>17</sup>caohachaain acaauru suujua cuhane coaacure-nihane jaun, Cana Coaunera esenetaa-uruhane jianecure. Nii jaunte Cana Coauneraacha beratenojoin esenetaain neeuruhane jana, cairichanojineein, cojunojineein, naaonjoaauruhane, Cana Coaunera esenetaaruhane jianecure.

<sup>18</sup>Jana leeocho cachaaurute, nii ojoa jana nalunaa ucuhe rijjijeein neeure. Cana Coaunera beratenojoin aonacuruhane baiha niha natiin, <sup>19</sup>jataain acaauru ichaohacha que suujua teeuruhane jaunte, nechu jataain raaje necoritaain coriquihonanein nenaajereein, itolere sirina jerecuruhane jaun, caohachaain Cana Coaunera esenetaain tonoraarenehane jaun nitajeeure.

<sup>20</sup>Jana leeochoaurute atane caohacha choaee nalunaa ucuhe rijjijeein neeure. Acaaurute Cana Coaunera ere aonaain, caohachaain Cana Coaunera esenetaaure, nii chabana jianelanaala.

Nii esenetaeraauru tabaaurute, le ucuhe caje nichata choonca ucuheneein le tijirii caje tera, saota choonca ucuheneein, le fasha ucuheneein tera, naajoaain le tijirii caje teeurera rijjijeein neeure,” nae jetao acaauru rai Jesoso.

**Cono que cuaain cachaauru  
relaa Jesosone**  
(Lc 8.16-18)

<sup>21</sup>Niritiin jetaote: “Nihei chuni cono mocohin bujuaihu tera. Nitohaneein bujuaihu telanaalate, jianacoon conohanau neeuruha turunacaaurune coina ecuun teeure. <sup>22</sup>Nii cono aina cuaainte jianacoon coitucunojoiniha cureein coitucuerae lanaala itolere asinojineein inaraacha ichai. <sup>23</sup>Aonacurumiin urichonacaauru,” naain jetaote:

<sup>24</sup>“Caohachaain nainaaain inaraacha aonai aonacuche. Charijieein teeinti leeochoaauru coaraqiche, nii rijjijeeinte inara netonai coareein Cana Coaunera. <sup>25</sup>Caohachaain niicha jerei rijjijeein ichaohin nere tonoraerate, jeelai amuritoheriin coroatajanereein Cana Coaunera. Nii rijjijeein techu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” nae jetao acaauru rai Jesoso.

**Omaroha ucuhene que cuaain  
acaauru relaa Jesosone**

<sup>26</sup>Niritiin jetaote: “Temule jaera cacha rijjicha Cana Coaunera cojoanonaa.

<sup>27</sup>Charijieein teeinti temule jaain, janotiin berailanaala sinii, jerichanejeein jiichoo berailanaala nihane tonohanau coitucuenihane jana omaroe nii niicha temui, nii rijjicha Cana Coaunera Cojoanonaa. <sup>28-29</sup>Charijieein teeinti, raajenihane omarohin, nalojoaacoaain, inacaain, inae tainaca que teein

cataa nii temulene taihure cachaauru, nii rijiicha Cana Coaunera cojoanonaa,” nae jetao acaauru rai Jesoso.

**Mosatasa ucuhe que cuaain  
acaauru relaa Jesusone**  
(Mt 13.31-32; Lc 13.18-19)

<sup>30</sup>Niritiin jetaote: “Chaaquenejianra inara rai Cana Coaunera cojoanonaa que cuaain aitete coitucuhicheta. <sup>31</sup>Leinjiin mosatasa ucuhe temunacai rijiicha. Acate itolere temulecuru ucuhe fautaain jataain aansijien. <sup>32</sup>Nete inae temunojoneein nihane, itolere temulecuru ocoana jana nenacaauru amurijiriin neleereein fojoein nuna seonjoan nihane jana, nichoae tajein loroore tajaecuru, nii rijiicha Cana Coaunera cojoanonaa,” nae jetao acaauru rai Jesoso.

**Coitucunaa nainecuruha nereentiaain  
araai laurii que cachaauru relaa Jesusone**  
(Mt 13.34-35)

<sup>33</sup>Nitohanein jetaote, araai laurii que cuaain itolere acaauruhacha coitucui-acaauru ichao que cuaain cachaauru relaain Cana Coaunera ere beebjeein acaauru relae, aonaain coitucunaa nainecuruha nereentiaain Jesoso. <sup>34</sup>Nitohanein jetaote, rai cacha nelanaala nenacaauru relaa Cana Coaunera Cojoanonaa quene, acaauruhacha coitucui-acaauru ichao que cuaain relanajae. Jana aina nerelanacaauru relaane jetaote, rauhijiriin, “Naonjoainte ne Cana Coaunera Cojoanonaa,” naain Cana Coaunera Cojoanonaa been que relanajae.

**Fichafichanaa aina cujuana  
suruaa Jesusone**  
(Mt 8.23-27; Lc 8.22-25)

<sup>35</sup>Nii cojoanotiin bananein aina nerelanacaauru rai jetaote:  
“Jamauchete nemuri jerau cunichaache,” nae jetao acaauru rai Jesoso.

<sup>36</sup>Nii jaun jetaote, ecu cachaauru ratiriin, nii fauhin lauhequiin cachaauru relaa Jesusone jaan bote cuhane fauhin amauruha aina nerelanacaaurune jana jetao, acaauru jiniichaain cuure leeochoa boteeuru. <sup>37</sup>Nitohanein cuuruhane jana jetaote, jataain mijiaaieein uha cujuana tabai aina fichafichanaane jana jetao, acaauru bote cuhane acau enoaa fichafichanaane jaun, inae nalunaa jere nii cuurunaja bote. <sup>38</sup>Nii jana bote roe cuhane binaao choae tocoequiin siniin siniicha Jesusone jana jetaote:

“Cacha relaera chajaain nocoo. Inae nalurichaacheje. Tana inae nalunaa jerichaachene que tonajeine,” naauruha nocoain aina nerelanacaaurune jana jetaote, nimichuhin:

<sup>39</sup>“Cooa inooniha. Chajaain nesuruu,” naa nii nemuri fichafichanaa rai Jesusone rijieeoritiin jetao, nesuruha cujuana aina nii fichafichanaane jaun raotojoein cuujeure. <sup>40</sup>Inae nesuruha nii fichafichanaane baiha jetaote:

“Chanuna jataain nesoneeiche. Chanuna cha esenetaeneeiche,” nae jetao nii aina nerelanacaauru rai Jesoso. <sup>41</sup>Nejetaote jataain nesoonetooruhane jaun jetao:

“Chatohananeeinna ne caa cachate, nere tonoraain nesurue cujuana tabai aina nemuri fichafichanaa,” naaure jetao ecu ita rai nii aina nerelanacaauru.

**Cadara bataneu niha suujua cuhane  
moconajaera letono siricha cachane**  
(Mt 8.28-34; Lc 8.26-39)

**5**<sup>1-2</sup>Nitohanein cuhin inae nemuri jerau tururuha Cadara batane que jana, iniha cuha Jesusone jana jetaote, que tacaain coinetiha cue leinjiin cacha-suujua cuhane moconajaera letono siricha. Nii cacha jetaote atane bana caje uhin ai, <sup>3</sup>ecu ichaohane jaun. Nitohanein rai suujua cuhane moconajaera letono sirihane jaun jetaote,

*cadena* que niha natiin ichohana nainene chuni. <sup>4</sup>Araai saain tijia aina biji ichohacuruha *cadena* quene niha natiin jetaote, molomolonijihanaane jaun, chatohaneein tenaa nainene nii chuni. <sup>5</sup>Nii jaun jetaote, janotiin, jiichoo netojoeinchuru ichatane janaauru amuhemujueein, atane banaauru ichoae amuhemujueein, eheehejeein, ajeri jaberoco ichoae comohin, naaonjoain amuhemujue nii cacha. <sup>6</sup>Nii jaun jetaote, coriaae uujihha Jesusone coariin, jeluhariin coinetein nacatiha neseonriaain ehequiin jetao:

<sup>7</sup>“Jiaonriha caniha nenoaain carerojoe-caaine, acaihanijin nenea Cana Coaunera Calaohi Jesoso. Jiaonriha atiin nohane Cana Coaunera coreniha chatohaneein caeteetine,” nae jetao <sup>8</sup>nii cacha suujua cuhane nenea moconajaera letono. Nii cacha suujua jianein amuhane coina: “Nii cacha suujua cuhane neein, cacha suujua aasaequine caje mituhin amuura moconajaera letono,” naa Jesusone jaun. <sup>9</sup>Niritiin jetaote:

“Tonaa ii curuaa,” naain caje bajaa Jesusone jana jetao,

“Jataain araaichaanune jaunte Lejion ne canu curuaara,” nae jetao Jesoso rai.

<sup>10</sup>Nejetaote, jelai batane caje jaoha Jesusone caohate jataain nii moconajaera letono nii cacha suujueniha nenea.

<sup>11</sup>Nii jana ichatane ucuuno rohan lenoniha neeuurua arajiin coosichurune jaun jetaote:

<sup>12</sup>“Atiin taa coosichuru suujua cuhane canacaanu letoaa,” naaure jetao Jesoso rai, nii moconajaera letonocuru cacha suujua cuhane nenacaauru.

<sup>13</sup>Nii jaun caje bajaauruhane rijitjoein jeriha Jesusone jaun jetaote, nii coosichuru suujuaniha enooruhane jaun, ucui caje nomaroteein acauhanau naluhin, acau que nereeonohin oore nii coroata oaraancai coosichuru.

<sup>14</sup>Nii jaun jetaote, nii coaraain jelai caje sorohin, neseeu cuhin, nenaana-jaaunru, naaonjoainu cuhecujueein biha cuuruha nii coosichuru beraihurerane jaun jetao, turuhin coaraa cuure cachaauru. <sup>15</sup>Nii jana jetaote, nii niha Jesusone jaun turuuruhane jana jetao, cojurihu cacha caohachaneein nenea tocohaneein necoreetein lajuuae, nii suujua cuhane arajiin moconajaera letono coitucuhuhi siricha cacha. Nii jana coaraain nesooneetooruha nii coaraa cunacaauru cachaaurune jana jetaote, <sup>16</sup>nii coosichuru suujua cuhane enooruha nii moconajaera letonocurune jana, ooruha nii coosichurune jana, nerautaa nii moconajaera letono siricha cachane beure nii coaraa cunacaauru rai, nii ecu neein coarajeeurera cachaauru. <sup>17</sup>Nii jaun jetaote, chajaain erojoein jelai caje amuha Jesusone luhecaauere cachaauru.

<sup>18</sup>Nii jana, inae jelaiha bote cuhane fauha cuha Jesusone jana jetaote, aina cuhane coina rai aite nii moconajaera letono sirihane caje nerautanaa cacha. <sup>19</sup>Nejetaote, aina cuhane jerelanaala:

“Chajaaincha chenenajaun cauhin, charaaichuru rene turuhin, cairichaa-joaain ii coaraain itolere ichaa iniha Cana Coaunerane benihun acaauru rai,” nae jetao rai Jesoso.

<sup>20</sup>Nii jaun jetaote, Decapolis batane que nenacaauru nenaanajaauru cuhecujueein, itolere ichaa coreniha Jesusone biha nii cachane jaun jetao, satiin cojoelatoore aonajeeurera cachaauru.

**Jairo cacunu aina leinjiin  
ene rautaa Jesusone  
(Mt 9.18-26; Lc 8.40-56)**

<sup>21</sup>Nii baiha jelaiha nemuri jerau cauha cuha Jesoso, bote cuhane jana jetaote, najiniha arajiin netaojiaain cohacuruha nemuri auhaniha cachaau-

rune jaun jetao, ecu turuhin ne nii cachaauru aina Jesoso. <sup>22</sup>Nii jana jetaote, turuha cue leinjiin sinacoca curuaanaa neein nenea Jairo. <sup>23</sup>Turuhin jetaote:

“Onaa jeriha canu cacunune jaunne ii coaraa uun. Chajaaute atiin nohane turuhin nichoae ii biji meracaete nerautaaïn ichaohine,” nae jetao Jesoso acatiha neseonriaain nii Jairo.

<sup>24</sup>Nii jaun jetaote, aina cuha Jesosone jana, jiniichaain cuuruha arajiin cachaaurune jaun jetao, jataain arajii cachaauru cataaun cuujue. <sup>25</sup>Nii arajiin cunacaauru cachaauru jana jetaote cue, leinjiin ene lechoonca coroata jaanacaain jaberoco caje ichana jaohajeein nenea. <sup>26</sup>Aca jetaote, nii rai chaque nelatejeeane que airijiin jitariin niicha sirii jaohin arajii cache coicharaauru que nocoicharatihane niha natiin nerautasilanaala jataain taaeneein cuujue nii rai cunai. <sup>27</sup>Nii ene jetaote, Jesoso benea inaoriin cuhin coaraain, leeochoauru cachaauru jana cutiin, Jesoso janori nichae marotiin cajione auha mucuuri, <sup>28</sup>“Caa cajione auha mucuurihanune niha natiine nerautareeunni,” naain esenetaane jaun. <sup>29</sup>Nii Jesoso cajione mucuhane rijieeoriitiin nesuruha ichanane jana jetaote, inae nerautanaanein naonae rai jaberoco. <sup>30</sup>Nii jana caje mituha niicha ichana nainei cache rautaane jaaque nainaan jetaote, nii cachaauru coaraain:

“Chana toon cacajione mucue,” naa Jesosone jana jetaote,

<sup>31</sup>“Tana jeranu ii sururucuruha cachaaurune coaraainete. ‘Chana toon cacajione mucue,’ naain bajaai,” naaure jetao Jesoso rai nii aina nerelana-caauru.

<sup>32</sup>Nejetaote, rai cajione mucuera coaraane coina, nii rohan nenacaauru

cachaauru cajanaain coarae Jesoso.

<sup>33</sup>Nii jaun jetaote, nesoone caaun rijijijianein nacatiha neseonriaain, nii suujue lanaala esinae rauhijiriin, “Naonjoaain ii cajione mucuhanune rijijieeoriitiinne caa canu cunai caje nerautaaun” naain be nii ene. <sup>34</sup>Nii jaun jetaote:

“Ii rautana nainichaaunne esenetaaine jaunte, inae nerautaaï. Raotojoein raurohin caunihun,” nae jetao nii ene rai Jesoso. <sup>35</sup>Niritiin ereereeca nii ene rai Jesosone jana jetaote, nii ranuna inaca sinacoca curuaanaa Jairo loreri caje turuha uure cachaauru. Rene turuhin jetaote:

“Inae oha ii cacunu. Coa inacojoein nii cache relaera roheca,” naaure jetao nii cachaauru. <sup>36</sup>Nejetaote, nii acaauru aohana jerelanaala nii sinacoca curuaanaa rai jetao:

“Jiaonriha acaauru esenetaain nesooneine. Raujiaaincha rautaanune esenetaau,” nae jetao Jesoso.

<sup>37-38</sup>Nitohanein inae nii sinacoca curuaanaa loreri asae turuuruhane jana tonijiaain cojioriin chanaauruha cachaaurune jana jetaote, aina cuuruha leeochoaurune jerelanaala, Fedoro, Saantiaao, chaen nii Saantiaao nejera Joaan, naonjoainuri aina jiniiquiin enohin jetao:

<sup>39</sup>“Chanuna niritiin cojioriin chanaaiche. Coatihane ohane jaun aihei caa ranuna. Sinihane jaunte ai,” naa Jesosone jana jetaote, <sup>40</sup>Jesoso coenacure cuu nenacaauru cachaauru. Nii jana jetaote, satiin nii cuu nenacaauru cachaauru mitaain, nii ranuna inaca aina neba, chaen corihaniha cunacaauru, naonjoainuri aina jiniiquiin nii ranuna rene enohin jetao, <sup>41</sup>biji que mucuuriin:

“Talita coom,” nae jetao nii ranuna rai Jesoso. “Icheine aitoon ranuna.

Nimichuu,” naa jetaote aite Joriocuru ere cuhane.

<sup>42</sup>Nii rijieoritiiin nimichuhin ruharuhaca nii lechoonca coroata jaanacai ranunane jana jetaote, cojoelatiin coarajeure nii cuu neein coarajeerera cachaauru. <sup>43</sup>Nii jana jetaote, jataain chuni rai beeuruhane caohatihane baiha jetao, nii ranuna coroaateeuruhane coina aite Jesoso.

**Nasarete cuha Jesosone**  
(Mt 13.53-58; Lc 4.16-30)

**6** <sup>1</sup>Nii baiha jetaote, aina nerelana-caauru aina jiniiquiin, jelai caje cuhin rai nataneu cauha cue Jesoso. <sup>2</sup>Inae nataneu turuhin, nebetacanaa cojoanonaa bana sinacoca asae enohin cachaauru relaane nunuhetiha Jesosone jana jetaote, nii relanajaa Jesosone aonajejin jetao:

“Chuna nerelaete toritiin itolere coitucuhin que cache relae. Chaa cajena itolere coitucutiin, chabana coaraai cojoelanaacojoai ichaane coinane maajejin nerelae. <sup>3</sup>Tana caa, Mariha calaohichuru Saantiaao, Jose, Jodasi, Simoon, naaonjoainuri nejera, tabara caje itolere rucuhale icharaneein nena carfinteroneein nerejetohane. Tana chaen rai baihuru cau cana aina ichaoruhane,” naain jetao ita caje bajaure cojoelatiin, nii ecu arajiin nenacaauru cachaauru. <sup>4</sup>Niritiin rai nere tonorana jerecurenihane jaun jetaote:

“Itolere banate niqui cuhane jaanru, Cana Coaunera ere bera *profeta* que suujua acatein esenetaain neure cachaauru. Nete laen rai nataneu nenacaauru naraachuru que suujua acatein esenetana jerecurene. Niheichu nii nihane jaan loreri asaa nenacaauru niha natiin esenetaauruhi,” nae jetao acaauru rai Jesoso.

<sup>5</sup>Niritiin jetaote, ecu cojoelanaacojoai ichaelanaala, corootajajejin ecu

nenacaauru cunaitenacaauruhacha mucuhin rautanajae. <sup>6</sup>Nitohanein esenetana jerecurenihane cachaaurune jaun jetaote, acaauru cojoelate Jesoso.

**Cana Coaunera cojoanonaa  
beebejeeuruhane coina aina  
nerelanacaauru letoaa Jesosone**  
(Mt 10.5-15; Lc 9.1-6)

Nii baiha jetaote, Nasarete rohan nenacaauru neseeuuru cuhecujuein, cachaauru relae cue Jesoso. <sup>7</sup>Nitohanein jetaote, leeocho neseeuuru cuhecujuein cache suujua cuhane nenacaauru moconajaera letonocuru coitucuhichuru sitaain cachaauru rautaauruhane coina nii lechoonca corootajaaain aina nerelanacaauru cotijiaain cocoainanajaain letoanajae corootajaanana corootajaananaain Jesoso. <sup>8</sup>Nitohanein letoanajaain jetaote, acaauru atora, acaauru achano, coriqui, naaonjoain amaelanaala, <sup>9</sup>acaauru safatocuruhacha curujuaain, nii necoreeteeuruhane coina acaauru cajione amaelanaala, acaauru bijii achuneecha baaajejin bero cuhane cuuruhane coina acaauru rai aite. <sup>10</sup>Niritiin letoanajaain jetaote:

“Leinjiin loreri asae turuhichene, ecu sinihuche inaraacha ichai nainaain jelai caje amuhichene reentiaain. <sup>11</sup>Chunijihun turuhichene jaanru, caohachaain inara coana jerelanaala inara aohana jerecurenihane, jelai caje amuuche, inara safato que nena utoone riariaain ratiriin, inae nitajeeuruhane rai neeuruhane que nainacuruhane coina,” naain jetao nii aina nerelanacaauru letoaa Jesoso.

<sup>12</sup>Nitohanein cuhin jetaote, nacoauneein Cana Coaunera coitucuhin aca jerihane rijijiein neeuruha cachaaurune coina acaauru rai aitiin, <sup>13</sup>arajii moconajaera letono sirichaauru cachaaurune maajejin raataain, arajii cunaitenacaauru rautaaure erene que rujuanajaain nii aina nerelanacaauru.

### Oha Joaan Baotisitane

(Mt 14.1-12; Lc 9.7-9)

<sup>14</sup>Nitohaneein itolere ichaa Jesosone beeuruha itolere sacuritaaine jaun jetaote, Erodesi netonai coitucue.

Chaen jetaotechu: “Joaan Baotisitane ichanacaihara. Nii jaunte, nii itolere cojoelanaacojoai ichana naineranein necaihara,” naa Erodesine jana jetaote; <sup>15</sup>“Jerihanete *Profeta* Eliasinecaihara,” naaure leeochoaauru. Nii jana leeochoaauru jetaote: “Inoaenlu *profetacuru* rijijieein nenea *profetate* aicaihara,” naaure. <sup>16</sup>Nejetaote, niritocuruhane aonajihane jaun: “Acate Joaan ne. Rai nuluno moloeratihanulu natiinte, inae nacooaunein o caje ichanacaiha,” nae jetao Erodesi.

<sup>17</sup>Erodiase coreniha jetaote, Joaan mucerateein *cadena* que ichojoaain caresero cuhane terate Erodesi. Nii Erodiase jetaote, Erodesi nejera Ferifi comasainein nelu. Nejetaote, comasainein sirilu Erodesi nii rai nejera comasainihane saijieein. <sup>18</sup>Nii jaun jetaote:

“Jiaonriha ii comasainein taa inejera comasai siriinera,” nae jetao Erodesi rai Joaan.

<sup>19</sup>Niritoha Erodesi rai nii Joaane caje coaunein jetaote, nii Joaan cotaairiin sohin jaohene rijitoejin nerejete Erodiase. <sup>20</sup>Nejetaote sohin jaonaa nainene, esinae rauhijiriin leinjiin cacha- saantonein Cana Coaunera letononein nihane coitucuhane jaun, coasiha cocoateranein niha Erodesine jaun. Nitohanihane jaun jetaote, iriha Joaane rautatiin aonaane jaun nii aina chatohanai niicha ichanenu coitucuelanaala ne Erodesi.

<sup>21</sup>Nejetaote, nejanoa bajaanaa bitoane coina lenone jaain, que jauriinein nenacaauru curuaanaacuru, chaen rai soondarooru curuaanaacuru, chaen

Calileea cocoaichacuru jataain nelatecuri cotijiaain beseta ichaa Erodesine jana jetao, Joaan sohin jaohene rijitoejinjaaocane jana, suujua rijijieein erue Erodiase. <sup>22</sup>Nii jana jetaote, nii beseta ichaane jaa coloheri asaae enohin raansaa cuha nii Erodiase cacunune jana jetao, nii raansaane jana rautatiin coaraje Erodesi, nii ecu aina lenoniha nenacaauru aina jiniiquiin. Nii jana jetaote:

“Joaareen iicha jerei bajaau cacajene ichei tera. <sup>23</sup>Cana Coaunera notaracaaene chelai, iicha jerei bajaai cacajene tereunicha. Nainichaaun cataaun leruhin caa quiicha beraai atane tihanunera,” nae jetao araai saain nii ranuna rai Erodesi. <sup>24</sup>Nii jaun jetaote, jelai caje mituhin:

“Cha bajareun cajete oma,” naa cuha neba raine jana jetaote:

“Chajaain ena caje Joaan Baotisita couturi bajaau,” nae jetao nii ranuna neba.

<sup>25</sup>Nii jaun jetaote, jelaiha soronein enohin jetao,

“Ena carai leinjiin plato cuhane Joaan Baotisita couturi teinene jereeun,” naa jetao cue nii ranuna Erodesi rai.

<sup>26</sup>Nii jaun jetaote, jataain inaderae Erodesi. Nejetaote, satiin niicha cotihacuri urichoo Cana Coaunera notaracae aitohane jaun, nii caje niicha bajai tenaa nainenihane que aitona nainene. <sup>27</sup>Nitohanihane jaun jetaote, nii rijieoritii leinjiin soondaro letoae Erodesi, Joaan couturi molohin raa cuhane coina. <sup>28</sup>Nii jaun jetaote, caresero cuhane cuhin Joaan couturi molohin leinjiin plato cuhane uhaain, nii ranuna rai tiha soondarone jaun jetao, neba rai te nii ranuna.

<sup>29</sup>Nii jana jetaote, inae nitohanein Joaan teuruhane coitucuhin jetao, nii Joaan jaberoco raain conautiha cuure sacuureraauru.

**Saoqui oaraancai cachaauru  
rai lenone faa Jesosone**

*(Mt 14.13-21; Lc 9.10-17; Jn 6.1-14)*

<sup>30</sup>Nitohaneein letoanajaa Jesosone caje turuhin jetaote, aina netaojiaain itolere ichaaain Cana Coaunera ere que cachaauru relain, naaonjoaauruhane beeure Jesoso rai, nii lechoonca coroatajaain niicha cocoaanauri afosotoorune jana jetaote:

<sup>31</sup>“Chajaauchete neniha cachane jaun cuhin, jelai raotojoein nebetacanichaa- chera,” nae jetao acaauru rai Jesoso, cauhajeeuruhane niha natiin arajiin turuhajeeuruha cachaaaurune jaun, lenonecuruhane teurenihia acaauru raine jaun. <sup>32</sup>Nii jaun jetaote, leinjiin bote cuhane fauhin neniha cachane jaun, jelai Jesoso aina cuure nii niicha cocoaanauri afosotooru. <sup>33</sup>Nejetaote, arajii cacha cuuruhane coarajihane jaun, nii cuuruhane jaun jelai coitucuhin, satiin neseuru caje arajiin cuhin jetao, acaauru ajiniha soroneein jeluhaarin cuhin turuure. <sup>34</sup>Nitohaneein cuhin acaauru ajiniha turuuruhanne jaun jetaote, ecu turuhin bote caje iniha cunajaun jetao, arajiin ecu cachaauru coaraa Jesosone jana, beraicha colane nena carenerocuru rijjijeein aihuruhane jaun jetao, cairichaojoaain acaauru coaraane jaun, ecu araai laurii niicha coitucui que relanajae Jesoso. <sup>35</sup>Nii jana inae sohane jaun jetaote, rohan nichuuntaain:

“Inae soha. Coatiha nihei caa jana cacha. <sup>36</sup>Chajaaain cachaauru rai nocoeute ichuun nenacaauru nenaana- jaauru, neseuru, naaonjoinuri cuhin, chaelai lenone ariin coretiha cuuruhane,” naauruha aina nerelana- caaurune jana jetaote:

<sup>37</sup>“Niriimiin. Chajaaain acaauru coroateeuhe inara,” naa Jesosone jana jetaote,

“Aihana jaunna, coroata fashai denario coreneein faan coretiha cuhacaanune jeree, acaauru coroaati- chaachene caina,” naaure Jesoso rai aina nerelanacaauru. Nii le denariote le jiichoo amihanenaa core ne. Niritocu- ruha aina nerelanacaaurune jaun jetaote:

<sup>38</sup>“Inatajaain faan siriqiche. Chajaaain coaanihuhe,” naa Jesosone jaun, coaraain jetaote, “Saoquijeein faan, ita que jerajejeein ate, naajeeichate neeje,” naaure jetao aina nerelanacaauru.

<sup>39</sup>Nii jaun jetaote, joaenreen omame ichoae nelauriaauruha cachaaaurune caina aitoaha Jesosone jaun jetao, <sup>40</sup>tabaauru le fashaaain, tabaauru saoqui chooncaain, naaonjoaain neleruhin nelauriaaure cachaauru. <sup>41</sup>Nitohaneein laurianaacane baiha jetaote, nii saoquii faan aina coroatajai ate raaoriin jabaaequiin dede coarajeein jetao, Cana Coaunera bajaain cataaun faan taturiin aina nerelanacaauru rai te jetao Jesoso, cachaauru rai chaluuruhanne caina. <sup>42</sup>Nitohaneein jetaote, jerecuruhane jaaun tiaojoaain nainaaain lenonecu- ruhanne baiha, <sup>43</sup>lechoonca coroata omariin, nii faan aina ate caute que omari memoaaure.

<sup>44</sup>Saoqui oaraancai cachaauru jetaote, nii saoquii faan que lenonecure, acaauru rai faa Jesosone jaun.

**Acau choaae amuha Jesosone**

*(Mt 14.22-27; Jn 6.16-21)*

<sup>45</sup>Nii baiha jetaote, aina nerelana- caauru letoae, bote cuhane fauhin nemuri jerau Betesaaidau ichoaichaniha turuuruhanne caina. Nii tonohanau jetaote, ecu nedaaain cachaauru rai necoe Jesoso. <sup>46</sup>Inae cachaauru rai nocoihane baiha jetaote, ichtatane ucuuno que cuhin Cana Coaunera baja cue. <sup>47</sup>Nii jana jetaote, inae nocohe-

jihane jana, nemuri cataaun cuujueure nii aina nerelanacaauru bote cuhane. Nii jana jetaote, ecu jelai atane choae jaiti nihane jana, <sup>48</sup>acaauru que tacaain uha cujuanane jaun, necairichajein taraacajein cujueuruhane coaraje Jesoso. Nii jana inae janohe lalajihane jana jetaote, acaauru caajjie acau choae cuhin acaauru rohan situha cunaa rijijieein acaauru nichae cujue. <sup>49-50</sup>Nitohaneein acau choae cujihane jana, satiin coaracuruhane jaun jetaote, nesoonetiin anucainiha been auhaacure. Nii rijieeoritiin jetaote, acaauru rai:

“Jiaonriha inacojoein nesoonetiin casiichene. Canune aihunra,” naain, <sup>51</sup>acaauru aina bote cuhane fauha Jesusone jana jetaote, inae nesuruha cujuanane jaun, jataain cojoelatoore, <sup>52</sup>nii cojoelanaacojoaain faan faain acaauru notaacane sainejein itolere ichana nainihane que nainaelanaala, “Naaonjoanne jaunte catohanai ichae,” naain coitucunaa nainecurenihane jaun.

**Genesareta bataneu turuhin  
cunaitenacaauru rautaa Jesosone  
(Mt 14.34-36)**

<sup>53</sup>Nitohaneein cuhin nemuri jera jaauruhane jaun jetaote, Genesareta bataneu turuhin, ecu acaauru bote jauriaain cositeure. <sup>54</sup>Inae bote cositeein caje inihuruhane rijieeoritiin jetaote, Jesoso nihane coitucure nii cocoachacuru cachaauru. <sup>55</sup>Nii jaun jetaote, satiin nii jelai batane sacuritaain nii niha Jesusone jaan jelai coitucuhin jetao, rene cunaitenacaauru amaure ela cuhane tijichanjaain. <sup>56</sup>Chunjijihun nenaanajaunru, neseeuuru, berooru cuhane, naaonjoainu cuha Jesusone jaunru jetaote, najiniha situanjaunru jeloon ela choae cunaite-nacaauru teein, Jesoso rai aitocure,

cajione auha mucuuruhane caina. Nitohaneein satiin Jesoso cajione mucuurera cunaitenacaauru jetaote, nerautaacoaure.

**Baasoneein cache ichao tera  
(Mt 15.1-20)**

**7** <sup>1</sup>Nitohaneein jetaote, Jesoso coaraa cuure Jerosaleeun caje turunacaauru Moisesa aitoonjoan que cache relaureraauru aina fariseecuru.

<sup>2</sup>Acaauru jetaote, aihuruhalu acaauru inoaensihurune rijijieein acaauru rai rauhi tonoraelanaala lenonecuruhane ajiniha biji culejelanaala lenonecuruha Jesoso aina nerelanacaauru tabaaurune coaraain jetao, acaauru que ereure.

<sup>3</sup>Nitohaneein aihuruhalu acaauru inoaensihurune rijijieein ichaauruha fariseecuru aina satiin Jorioocurune jaun jetaote, lenonecuruhane ajiniha biji culejein lenonecure itolere bana.

<sup>4</sup>Jerichanejein jetaote, lenone arihuruhane caje turuuruhane nii aitoaha acaauru rai rauhine rijijieein biji culejein lenonecure. Nitohaneein jetaote, araai lauriin ne acaauru ichao, lenonecuruhane ajiniha acau cooruhane jaan curu niha natiin culejein, acau curu culejein, coadarojoe culejein, acaauru sininaja jelai niha natiin culejein, naaonjoaunruhane jaun.

<sup>5</sup>Nitohaneeuruhane jaun jetaote:

“Chanuna nii aitoaha rauhine rijijieein aihuruhalu cana inoaensihurune rijijieein, lenonecuruhane ajiniha biji culejein lenonecure ne ii aina nerelanacaauru,” naure jetao Jesoso rai Moisesa aitoonjoan que cache relaurera aina fariseecuru.

<sup>6</sup>Nii jaun jetaote acaauru rai:

“Esinae rauhijiriinte, inara que aitiin laenaelu Cana Coaunera ere bera inoaensi *profeta* Isaihasi, nechu jataain nohaniha Cana Coaunera coitucutoha nocoenacaauru.



Nii que aitiin:

‘Caa cachaaurute,  
nechu jataain nujuaaecha que  
canu corojeein neeure.  
Nete acaauru suujua,  
cacaje coriaae ne.

<sup>7</sup> Nii jaun  
nii chaque nelatejeehai  
netaojiaain  
canu coroaecuruhane,  
nechu jataain  
caitoonjoanelanaala nena que  
nejesinajeein ita relajeein  
aihuruhane jaun,’

naa Cana Coaunera acaauru quene  
laenaelu *profeta* Isaihasi.

<sup>8</sup> Chanuna nitohaneein Cana Coaunera  
aitoonjoan que jaolecchin inara  
inoaensihuru rijijieein ichaonaa  
jeriquiche inara,” naa acaauru raine  
baiha jetaote:

<sup>9</sup> “Itolere bana inara inoaensihuru  
ichao rijijieein ichaonaa jeriquichene  
jaunte, Cana Coaunera aitoonjoan que  
jaolecchin aohana jereneeiche.

<sup>10</sup> ‘Inara inaca, inara neba,  
naaonjoainuri que  
inara suujua acateein neeuche.  
Chateeinti  
baasoneein neba, inaca,  
naaonjoain que ereein ne.  
Niite ateinanohiniha cureein,’

naelu jetao Moisesa. <sup>11</sup> Nete inara  
aitocoiche, leinjiin cacha, rai inaca, neba,  
naaonjoain rai. ‘Coatiha inara rai cha tenaa  
nainihaaun, satiin quicha sirii corban  
nein nihane jaun,’ naane caohachae inara  
rai. (‘Corban,’ naane jetaote, acaauru ere  
cuhane, ‘Cana Coaunera que banijiaain  
nena,’ naa aite.) <sup>12</sup> Chaen techu, inara rai  
caohachae, inae niritiin erei cacha, rai  
inaca, neba, naaonjoain rai chaaelai tenaa  
nainenihane que aitocoichene.

<sup>13</sup> Nitohaneein inara inoaensihuru  
ichao sacuhin neeichene jaunte, Cana

Coaunera aitoonjoan tonorana  
jerelanaala itajeein neeiche, nejesina-  
jeein jelaaicha que ita relaain neeichene  
jaun,” nae jetao Moisesa aitoonjoan que  
cacha relaurera aina fariseeocuru rai  
Jesoso.

<sup>14</sup> Niritiin jetaote, nacoaauneein nii  
ecu nenacaauru cachaauru cotijiaain  
jetao:

“Satiin caa ena inara rai aitocooaunne  
jaan aonaain coitucuche. <sup>15</sup> Coatiha  
joaereen lenone quiha cachane coreniha  
que jaolequiin nihei Cana Coaunera.  
Leeochaauru cairichanaa jerenacaun,  
suujua cuhane baasoneein coacuhin  
baaso ichaeraauru quete laen jaolequiin  
ne Cana Coaunera. <sup>16</sup> Esinae rauhijiriin  
urichocoichene aonacuche,” nae jetao  
acaauru rai Jesoso.

<sup>17</sup> Niritohane baiha ecu cachaauru  
ratiriin loreri asae enoha cuha Jesusone  
jana jetaote, nii cachaauru relaane jaan  
bajaare caje aina nerelanaacaauru. <sup>18</sup> Nii  
jana jetaote:

“Tana inara netonai aonaain  
coitucuhichene. Tana joaereen lenone  
quiha cachane coreniha que jaolequiin  
neniha Cana Coaunerane coitucuhi-  
chene. <sup>19</sup> Nii cachaacha quii lenonete,  
nii cacha suriicha cuhane enohin, nii  
baiha mitue, suujua cuhane  
enoelanaala,” nae jetao.

Niritiinte, joaenreein lenone quiha  
cachane niha natiin, que jaoleconaa  
nainenihana Cana Coaunerane coitucue-  
rate cana que Jesoso. <sup>20</sup> “Cacha suujua  
caje mitunaa baaso niicha coacui, niicha  
ichai, naaonjoain corenihate laen, cacha  
que jaolequiin ne Cana Coaunera.

<sup>21</sup> Nitohaneein suujua cuhane  
baasoneein coacuin baaso ichaeraa-  
rute, namute quicha aina niha natiin  
ichao jeracchin, asijiauharitiin,  
sonajaain jaohin, <sup>22</sup> sinijeranelanaala  
nena ene aina ichaohin, laurijira

rucuhele jereein, namute cacha cairichanaa jerenacaan que ereein, namute cacha coritaain, itolere niicha jerei nejesina ichaain, necoelajauharityiin, namute cacha cairichaa casajenetiin, namute cacha que necohasitaain, suujua coaraain chaachaelanaala, naaonjoaunre. <sup>23</sup>Niichurute satiin cacha suujua caje mituhin cacha que jaolequii niha Cana Coaunerane jaan teranein ne,” nae jetao acaauru rai Jesoso.

**Leinjiin Jorio nihei  
cacunu rautaa Jesosone  
(Mt 15.21-28)**

<sup>24</sup>Inae cachaauru relaane nainaain jetaote, jelai caje coauneein Tiro bataneu turuha cue Jesoso. Nejetaote, ecu turuhin leinjiin loreri asae enoe, coitucuruha jelai cocoaichacurune jerelanaala. Nii sainejeein jetaote, ecu turuhin nihane coitucuurihure. <sup>25</sup>Nii jaun jetaote, inae ecu nihane coitucuhane jaun, rene turuhin Jesoso acatiha neseonriiaa cue leinjiin ene, suujua cuhane moconajaera letono coitucuchuhi siriha rai cacunune jaun. <sup>26</sup>Nii ene jetaote, Jorio niheichuru Sirofenicia batane cocoaichacuru bene ne. Aca jetaote, Jesoso rene turuhin conujue cacunu suujua cuhane nena moconajaera letono coitucuchuhi sitaane coina. <sup>27</sup>Nii jaun jetaote:

“Coa canu roheca. Naininaaan Cana Coaunera cachaneein nenacaauru que banijiaain nena ruluhin tihanu remaae raine,” naa rai Jesosone jana jetao:

<sup>28</sup>“Aihachuhisi niquicha Curuaanaa. Atiin ii araichuru Joriocuru rautaaaine rijijieein canu cacunu rautaaainene jereunra. Remaae rijijieein canacaanu coaraaine niha natiincha,” naa Jesoso rai nii enene jana jetaote:

<sup>29</sup>“Aihachuisi. Esinae rauhijiriinte aitoi. Inae ii cacunu caje mituhin amuha moconajaera letono coitucuchuhi. Inae nainein jelaiha chenena-jaun cauha cuhinera,” naa Jesosone jaun, <sup>30</sup>nenajaun cauha cuhane jana jetaote, loreri asae sininajaun niha nii cacunu ranunane jana eruha cue nii ene. Nejetaote, inae nii ranuna suujua caje mituhin amue moconajaera letono coitucuchuhi.

**Urichoelanaala, raotiin eresilanaala  
naaajoaain nena cacha rautaa Jesosone**

<sup>31</sup>Nii baiha jetaote, nacoaaunein Tiro batane jelai caje amuhin, Sidoon batane, Decapolis batane, naaonjoainuri nenacaauru neseuru ichoae rauhijiriin situhin nitihonohin cuhin jetao, Calileea conemuri turue Jesoso. <sup>32</sup>Nitohanein inae ecu turuhane jana jetaote, rene leinjiin urichoelanaala, raotiin eresilanaala, naaonjoaain nena turuaain jetao, biji que dadaain nii cacha rautaane coina rai aitocure. <sup>33</sup>Nii jaun jetaote, jelai cachaauru udaa nii cacha amaain jetao, nuricho jachuuru cuhane biji couturichuru enoaain, lune soriin lele ichoae tein, <sup>34</sup>ecuun jabatoroain dede coaraain neraain jetao: “Efata,” naane jetao: “Najachuu,” naa aite Joriocuru ere cuhane.

<sup>35</sup>Niritohane rijieeoritiin, inae najachuha nurichone jana jetaote, inae raotojoein erena naine rai lele netonai. <sup>36</sup>Nitohanein rautaaain jetaote niqui, nii chuni rai beeuruhane caohate Jesoso. Nejetaote, jataain beeuruhane caohatiha sainejeein jataain que naurutaain beure. <sup>37</sup>Nii caje coitucuhin jetaote: “Itolere banate caohacha ichae, uricho saaecuru niha natiin urichohin, raotiin eresilanaala niha natiin erena nainein, naaonjoanne jaun,” naaure jetao cojoelatiin cachaauru.

**Jena oaraancai cachaauru rai  
lenone faa Jesusone  
(Mt 15.32-39)**

**8** <sup>1</sup>Nii baiha nacoaauneein netajiaauruha arajiin cachaaurune jaun jetaote, jataain neniha acaauru lenonena jaun aina nerelanacaauru cotijiaain jetao:

<sup>2</sup>“Inae nichata janohinte canu aina neure caa cachaauru. Jana nihei caohachananejeein lenonecuruhane jaanu. Nii jaunne jataain cairichaa-joain acaauru coaraaun. <sup>3</sup>Coroaatena-jaelanaala acaauru nenajaun letoanajaa-nunete mijitenacaun aterona nainecure, tabaauru coriae caje uuruhane jaun,” naa Jesusone jana jetaote:

<sup>4</sup>“Chaa caje eruhin najian caa jeoni cacha coroaaterichaache, caa jana ichaoha chuni cacha, caje coretichaa-chene jaanune coalanaala,” naauruha aina nerelanacaaurune jana jetaote: <sup>5</sup>“Inatajaain najian faan siriquiche,” naain acaauru caje bajaa Jesusone jana jetaote:

“Caaunsinejeeinchate neeje faan,” naaure jetao aina nerelanacaauru.

<sup>6</sup>Nii jaun jetaote, atane choae nelauriaauruha cachaaurune caina aitiin jetao, jerane biji que nii caaunsini faan mucuhin Cana Coaunera bajaain, cataaun nii faancuru tatuhin aina nerelanacaauru rai tiha Jesusone jaun jetaote, jitariin nii cachaauru rai chaluure. <sup>7</sup>Nii jana niha coroaatajajeein ate netonaine jaun jetaote, acaentoni mucuhin Cana Coaunera bajaain nii ate nemaajeein chaluherate Jesuso.

<sup>8</sup>Nitohaneein nainaan lenonecuruhane baiha jetaote, caute que caaunsineein omari memoaaunre. <sup>9</sup>Itolereneein jena oaraancai cachaauru jetaote, lenonecure. Nii baiha jetaote, acaauru rai

necoeein, <sup>10</sup>aina nerelanacaauru aina bote cuhane fauhin jetao, Dalmanotau bataneu cue Jesuso.

**Cojoelanaacojoai ichaa Jesusone caina  
aitocuruha fariseeocurune  
(Mt 16.1-4; Lc 12.54-56)**

<sup>11</sup>Nitohaneein jetaote, Jesuso rene turuhin aina ereeuruhane baiha jetao, nechu jataain coujuha, Cana Coaunera letononeein caa nihane coaratiha acaauru quene caina cojoelanaacojoai ichaane caina rai aitocure fariseeocuru. <sup>12</sup>Nii jaun jetaote, jataain mijiaaneein nerai raain jetao:

“Chanuna acaauru rai cojoelanaacojoai ichacaunne caina aitocure caa cachaauru. Coatiha nii acaauru que chatohanai cojoelanaacojoai coaratenaa nainihaaun,” naane jaun jetao, <sup>13</sup>ecu acaauru ratiriin jeelaiha bote cuhane fauhin nemuri jerau cue Jesuso.

**Faan jorerera lebadora rijiicha  
fariseeocuru ichaone  
(Mt 16.5-12)**

<sup>14</sup>Nitohaneein jelai caje bote cuhane fauhin amuuruhane jaun jetaote, rai nachano baiteein leinjiin faancha amaain cuure. <sup>15</sup>Nii jana jetaote, acaauru nainalaaca jetao:

“Aonacuche. Faan jorerera lebadora rijiicha fariseeocuru aina Erodesi ichaone que caohachaaain nainacuche,” nae jetao aina nerelanacaauru rai Jesuso.

<sup>16</sup>Niritoha acaauru rai Jesusone jana jetaote, neniha acaauru rai faanne que nejesinajeein ita rai ereeuruha aina nerelanacaaurune aonajeein jetao:

<sup>17</sup>“Chanuna faan sirineeichene que ereereequiche. Jataain nachura nainanachara nejeein coitucuneeichete. Jataainte asoneeojoaain nainanachara

nejeeiche. <sup>18</sup>Niha niqii inacojoein inara nota, inara uricho, naaonjoaain. Nete nii cha coaraain, cha aonaain coitucunaa naineneeiche. <sup>19</sup>Saoqui oaraancai cachaauru rai saoquii faan chaluhanune bana, inata omariin caute raachelu,” naa Jesusone jana jetaote:

“Lechoonca coroata omariin,” naauruha aina nerelanacaaurune jana jetao:

<sup>20</sup>“Chajana jena oaraancai cachaauru rai caaunsini faan chaluhanune bana, inata omariin caute raachelu,” naa Jesusone jana jetaote:

“Caaunsi omariineein,” naauruha aina nerelanacaaurune jaun jetao:

<sup>21</sup>“Nii saijieein nachura jaiti nainaeneeichete,” nae jetao acaauru rai Jesuso.

**Betesaidau leinjiin  
maosa rautaa Jesusone**

<sup>22</sup>Nitohaneein cuhin Betesaaida turuuruhane jana jetaote, Jesuso rene leinjiin maosa amaain rautaane caina conujeunre cachaauru. <sup>23</sup>Nii jaun jetaote, biji que nii maosa mucuuriin jelai cachaauru udaa amaain jetao, lune que jerane nii maosa nota rujuarujuariin nichoae biji tein: “Inae chelai coana naineei,” naa Jesusone jana <sup>24</sup>nenotaain jetaote:

“Nuna tocokaneinte murimurihonanae carai cachaauru,” naa nii maosane jaun jetaote, <sup>25</sup>nacoauneein jerane nota ichoae biji tiha Jesusone jana, nacoauneein nota jirichaane jana jetao, inae conoha notane jaun, caohachaain cha coarae nii maosa.

<sup>26</sup>Nitohaneein rautaaain jetaote, rai nenajaun letoain jetao:

“Coa taa neseu cauha,” nae rai Jesuso.

**Mesihasi niha Jesusone  
que aitoha Fedorone  
(Mt 16.13-20; Lc 9.18-21)**

<sup>27</sup>Nii baiha jetaote, Filipino batane que nena Sesareea nenacaauru neseuru

cue jetao, aina nerelanacaauru aina jiniiquiin Jesuso. Nitohaneein bero cuhane aina nerelanacaauru aina cuujeeurunajau jetaote:

“Tonacuruha canu que cachaauru. Cha nichaaunje,” naa Jesusone jaun jetaote:

<sup>28</sup>“Tabaauru cachaaurute Joaan Baotisita niha ii beeuere. Jana leeochoaurute, inoanlu nena Cana Coaunera ere bera *profeta* inoansi Eliasi niha ii beeuere. Leeochaaurute, inoanlu nenacaauru *profeta*curu tabaauru niha ii beeuere,” naauruha raine jaun jetaote:

<sup>29</sup>“Cha nichaaun jana inara rai,” naa acaauru rai Jesusone jaun jetaote:

“Iite nii canacaanuhacha cohajei Mesihaseein,” nae jetao rai Fedoro.

<sup>30</sup>Nejetaote, chuni rai acaneein nihane beeuruhane caohate jetao Jesuso.

**Orichaaaine biha Jesusone  
(Mt 16.21-28; Lc 9.22-27)**

<sup>31</sup>Nii caje nunuhetein jetaote: “Canu Cana Coaunera Calaoi cachanein nejanoanaa nichaaunne cairichaeriinte caque jaolecohin niha cuurureein Jorioocuru bichauhenaauru aina saseredotecuru curuaanaacuru, chaen Cana Coaunera aitoonjoan que cacha relaureraauru, naaonjoainuri. Acaaurute catinaa cuurureein, nena nichata janone cuhane ichanareeunni,” naain jetao, <sup>32</sup>esinae rauhijiriin cachaauru rai bee Jesuso. Niritiin esinae rauhijiriin suujuelanaala aithane jaun jetaote jelai amaain niritiin irihane caohate Fedoro. <sup>33</sup>Nejetaote niritoha Fedorone jaun, jaotoroain nii aina nerelanacaauru coaraain jetao cotaicha rijitiin: “Coa carerojoecaa moconajaera. Cacaje amuun. Coatiha Cana Coauneraacha coacui coitucuheei- ii. Joaereein cachaauruhacha coacuhite coaauqui,” <sup>34</sup>naane baiha jetaote, nii

aina nerelanacaauru aina ecu  
nenacaauru cachaauru cotijiaain jetao:

“Aonacuche. Chunocoha canu  
cachaneein nenea jerihane suujua  
letono ichana jerihane jianein, coroso  
que canu tein canu cairichaaururi-  
chaaaine rijijieein necairichanaa  
abaantaain caitoonjoa tonoraain,  
jerichaaunne rijijieein neeine. <sup>35</sup>Chuno-  
coha canuhacha icharatei ichaelanaala  
nein nichao ichoteratena jerera,  
coatiha nichoterinaain. Nete laen canu  
coreniha, canuhacha beratei bihane  
coreniha, naajoain coreniha nichao  
itajera, ichoteratenojoiniha cureein.  
<sup>36</sup>Chaaquena rai nelatere, itolere caa  
chauratane que nenaacha que coacuhin  
rai nichao itajiha cachane. <sup>37</sup>Nitoha-  
nihane jaun inaaonjoaain coretihane  
niha natiin nii nichao ichoteratena  
nainiheii cache. <sup>38</sup>Nitohanihane jaun,  
chunocoha canu nichaaunne beein  
quiicha beratenojoin biha caa necha  
aansainein osaaonacaauru cachaauru  
raine que nocoejihanena, canu-  
cacha calaohi nichaaunne inae que tihane  
bana canu Inaca necaohacha que  
necohachaaain rai letonocuru anjeraauru  
aina nacoaaunein turuha uhanune  
banane canuhetonai que necoeje-  
reunni,” nae jetao acaauru rai Jesoso.

**9** <sup>1</sup>Niritiin jetaote:

“Esinaae rauhijiriin coatiha  
oorurinaain cau ena canu aina  
nenacaauru tabaauru, niicha ichaneni  
ichaaain turuha Cana Coaunera Cojoano-  
naane coaracuruhane que tiaain,” nae  
jetao acaauru rai Jesoso.

**Nejelauneein ocooca Jesoso jaberocone**  
(Mt 17.1-13; Lc 9.28-36)

<sup>2</sup>Saota janone baiha jetaote, ichtatane  
ucuuno cue Jesoso, Fedoro, Saantiaao,  
Joan, naaonjoainuricha amaain. Inae  
ecu turuuruhane jana jetaote, acaauru

notaracaae nejelauneein ocooca Jesoso  
jaberocone jana jetao, <sup>3</sup>jataain  
caohatiin bichoronohin cajione amuriji-  
riin somajaain jiquihaquiin nedae rai  
cajione. <sup>4</sup>Nii jana jetaote, ecu Jesoso  
aina ecocohin ereeuruha inoanlu  
nenacaauru Cana Coaunera ere bera  
inoaensihuru, Irihasi, Moisesa,  
naaonjoainurine jana coarajeure.

<sup>5</sup>Nii jaun jetaote,

“Cacha relaera, jataainte caohate cau  
nihacachene. Coanete nichatajaain  
loanari jaacache, leinjiin ii rai, leinjiin  
Moisesa rai, leinjiin Irihasi rai,  
naaonjoaain,” nae jetao Jesoso rai  
Fedoro.

<sup>6</sup>Jataain nesooneetooruha nii Jesoso  
aina cunacaauru, aina nerelanacaaurune  
jaun jetaote, nii tonaain irihane jaa  
coitucuenihane jaaun aite Fedoro.

<sup>7</sup>Niritohane jana acaauru conaacotaa  
dede sacarine jaun jetaote, nii dede  
sacari jana tonii: “Caate jataain quiicha  
belaai canuhacha letoai canu  
Calaohinera, nere tonoraain neeuchera,”  
naa erenaane jana jetao aonajeure.

<sup>8</sup>Nii rijieeoritiin roaichu coaracuruhane  
jana jetaote, inae acaauru rohan neniha  
chunine jana jetao, ecu jelai acaauru  
aina niha Jesusone jana coaracure.

<sup>9</sup>Nitohanein jetaote, nii ichtatane  
ucuuno caje jelaiha faaujueein, nii niicha  
coaracuri beeruha chuni rai nii aina  
nerelanacaaurune caohate Cana Coaunera  
Calaohi Jesoso, inae o caje ichanaane  
baiha beeuruhane caina. <sup>10</sup>Nii jaun jetaote,  
suujuaacha cuhane nii niicha coaracuri  
ruhecure, oo caje ichanarihanine que  
aitohane coitucuenihane jaun ita caje  
bajaaebajajeein. <sup>11</sup>Nii jaun jetaote:

“Chanuna jauriaanejeein Irihasi  
tururichaaaine que aitocure- Moisesa  
aitoonjoan que cache relaaaureraauru,”  
naain Jesoso caje bajaauruhane jana  
jetaote:

<sup>12</sup>“Esinae rauhijiriinte niqui, itolere rucueraanu que jauriaanejeein tururichaain Irihasine que aitocurelu. Chanuna jana Cana Coanera Quiricha inoansi cuhane cacha Calaohineein nenea cairichanojoneein, jaoleneein niha curichaaaine que aite. <sup>13</sup>Aonacuche. Inae turuha uhalu Irihasine janate, que niicha jerei ichaain cairichaaurelu, nitohanihane caina Cana Coanera Quiricha cuhane aitiin laenanohinihane rijijieein,” naain jetao tonorae Jesuso.

**Moconajaera letono coitucuchuhi siricha leinjiin enamanaa rautaa Jesusone**  
(Mt 17.14-21; Lc 9.37-43)

<sup>14</sup>Inae jelaiha nii neeuurua aina nerelana-caauru leochaaurune jaau tururuhane jana jetaote, ecu acaauru aina neeure arajiin cachaauru. Chaen Moisesa aitoonjoan que cacha relaaurera tabaauru netonai ecu neein jetao acaauru aina ereereecure. <sup>15</sup>Nii jana uujilha Jesusone coariin jetaote, que tacaain satiin jeluhaariin cuhin jetao, jataain cojoelatiin rai iriha cuure. <sup>16</sup>Nii jana jetaote, acaauru rai:

“Tonaai acaauru aina ereereequiche,” naain acaauru caje bajaa Jesusone jana jetaote:

<sup>17</sup>“Cacha relaera, coaraaine coinane, cau ii rene canu calaohi uhaaun, moconajaera letono coitucuchuhi siriha suujua cuhanena jaun, erenaachara neein nihane jaun.

<sup>18</sup>Nitohanihane jaunte, chunijihun cuhane jaauru baasoneein mucuhane naineein atane choaae tocojoaain tacaain, nujuae caje lajaaqui mitaain, catu rihoneein, sefetaain te nii suujua cuhane nenea coitucuchuhi. Nii jaunne niqui ii aina nerelanacaauru rai aitoon nii suujua cuhane nenea coitucuchuhi sitaauruhane caina. Nete sitanaa nainesihurene,” naa nii acaauru jana nenea leinjiine jaun jetaote:

<sup>19</sup>“Jataain cha esenetaaichuru cachaauru. Cha carajaneeinna inara

aina nereeun. Cha carajaneeinna inara abaantareeun. Chajaain cajiha nii enamanaa uhaauche,” naa acaauru rai Jesusone jaun jetaote, <sup>20</sup>Jesoso rene nii enamanaa amaature. Nii jana Jesuso coariin jetaote, atane choae nii enamanaa siheite nii suujua cuhane nenea moconajaera letono coitucuchuhi. Nii jana jetaote, najaabu jabubuhin nujuae caje lajaaqui mitujuae nii enamanaa. <sup>21</sup>Nii jana jetaote, nii enamanaa inaca rai jetao:

“Chabana caje coaaneein caa catohane,” naa Jesusone jana jetaote: “Causine caje coaaneainte aicha.

<sup>22</sup>Nii jaunte araa saain usihanaauru comaaichuru, acaauhanaauru comaain ateinana jere nii suujua cuhane nenea coitucuchuhi. Nitohanihane jaun, aitiin cairichaaajoaain canacaanu coaraain, canacaanu coroatajaneun, rautana naineine,” naa nii enamanaa inacane jaun jetaote:

<sup>23</sup>“Tana rautana nainichaaunne esenetainete cacaje bajaai. Satiin quesenetaera raine niicha bajai ichaain neeun,” naa Jesusone jaun jetaote:

<sup>24</sup>“Jataainnachujian chesenetaaun. Cacorataaneune jataain jelai amuritoheriin chesenetaera,” nae jetao ehequiin nii enamanaa inaca.

<sup>25</sup>Nii jana arajiin netaojiaauruha cachaaurune coaraane jaun jetaote, nii enamanaa suujua cuhane nenea moconajaera letono coitucuchuhi rai jetao:

“Erenaachara neein urichoelanaala caa enamanaa tera coitucuchuhi, canune ichei aitoon caa enamanaa jianein caje mituhin amuhine caina. Jiaonriha nacoaaunein caa enamanaa suujua cuhane enohine,” naain suruaa Jesusone jana jetaote,

<sup>26</sup>nacoaaunein baasoneein nii enamanaa jaberoco tein cojioriae nii

suujua cuhane nenea coitucuchuhi. Nitohaneein tihane baiha onaa rijijieein teein, caje mituhin amuhane jaun jetaote, “Inae baasoneein jaberoco tihane caaunte jerihane inae ohe,” naaure nii ecu arajiin neein coarajeeurera cachaauru. <sup>27</sup>Nejetaote, biji que mucuhin michuha Jesusone jana jetao, nimichuhin nichaaurae nii enamanaa.

<sup>28</sup>Nitohanihane baiha aina nerelana-caauru aina jiniiquin leinjiin loreri asaae enoha Jesusone jaun jetaote, jelai ecu teteriin:

“Chanuna canacaanu nii coitucuchuhi sitanaa nainesinihacaanu,” naain caje bajaauruhane jana jetaote:

<sup>29</sup>“Catohanai moconajaera letonote nainichaa Cana Coaunera bajaacane ainaacha sitaacane,” nae jetao acaauru rai Jesoso.

**Caa quete coroata sae ohane biha Jesoso.**  
(Mt 17.22-23; Lc 9.43-45)

<sup>30</sup>Nitohaneein nii canaanai rautaane jaan jelai caje amuhin jetaote, Calileea turuhin rauhijiriin situujueein cuujeeure. Nejetaote, nii acanihane coitucuha chunine jerene Jesoso, <sup>31</sup>aina nerelana-caauru relanaa nainihane coina. Nii acaauru relaane jaan jetaote:

“Cacha Calaohineein nenaate cachaauru bijiu tenojoinihane jana ateinaa cuurureein. Nete nichata janohane baiha ichanareein,” naain aina nerelana-caauru relaane jana jetaote, <sup>32</sup>nii acaauru rai aitohane inaaureniha natiin jetao caje bajaarene necoatocuruhane jaun.

**Charijina jataain nelateinneein nere**  
(Mt 18.1-5; Lc 9.46-48)

<sup>33</sup>Nitohaneein cuhin, inae Cafere-naon turuhin loreri asaae enooruhane jana jetaote, aina nerelana-caauru rai jetao:

“Chaaque ita rai ereerejeein uhicheein bero cuhane,” nae jetao acaauru rai Jesoso.

<sup>34</sup>Nejetaote inauheneecha curuaae-quin aonajeeure, bero cuhane uujueein, “Charijina caa cana jana jataain nelateein nenaane,” naauruha ita raine jaun. <sup>35</sup>Nitohaneein inauheneecha aonajeeuruhane jaun jetaote, lelauria-riin nii aina nerelana-caauru lechoonca coroatajai cotijaain jetao: “Leeochaauru amurijiriin nenea jeriha chunine, acaauru rai nelateein itolereenein acaauruhacha jerei icharaneein neeine,” <sup>36</sup>naane baiha jetaote, biji que leinjiin canaanai mucuuriin acaauru cataaun teein jetao:

<sup>37</sup>“Canu coreniha caa canaanai raerate, jerichanejeein canu raane rijijieein aicheein. Nii jaun canu raera coatiha canuhacha raa airinaain, caletoaera Ofa netonai raate aicheein,” nae jetao aina nerelana-caauru rai Jesoso.

**Canaacha ichai ichara,**  
**coatiha cana que nejeratenaa nihei.**  
(Lc 9.49-50; Mt 10.42)

<sup>38</sup>Nii jana jetaote:

“Cacha relaera, ii curuaa aina cuaain moconajaera letono coitucuchuhi sitaain que suujueequin nenacaauru rautaa leinjiinne janane eruhin caohatihacaanu, cana jana nenaanein ainihane jaun,” naa Joanne jana jetaote: <sup>39</sup>“Jiaonriha caohateein neeichene. Chunocoha canu curuaanein netiin chojelanaacojoai ichara, nii baiha baasoneein erenaa nainihe canu que. <sup>40</sup>Canaacha ichai ichara, coatiha cana que nejeratenaa nainihe. <sup>41</sup>Chunocoha canu Curisito cachanequichene coreniha inara rai esinaeca niha natiin terate, esinae rauhijiriin rai cainanohiniha cureein,” nae jetao rai Jesoso.

**Jataain alalacaraa osa que nesarucuaane***(Mt 18.6-9; Lc 17.1-2)*

<sup>42</sup>Niritiin jetaote: “Chunocoha ena canu esenetajeeurerauru saruha osa quenete, nii ajiniha caohachare nuluno que leinjiin ajeri jaberoco tijichaain ichojoaain cucuana cuhane joaeraane. <sup>43</sup>Jana osa que ii saruha ichohiine moloo. Nii amuritoheriintejian caohachare le jerajei ichohii aina Cana Coaunera cojoanonaa que neeine. <sup>44</sup>Nabana le jerajei ichohii coreniha, nii chariji bana nii riano niha natiin ohin, nii usi tabai jacanaachara jana cuhine coataa. <sup>45</sup>Jerichanejeein osa que ii saruha ii tijiane moloo. Nii amuritoheriintejian caohachare le jerajei ii tijia aina Cana Coaunera cojoanonaa que neeine. <sup>46</sup>Nabana osa que ii saruha ii tijiane coreniha nii riano niha natiin ohin, nii usi tabai jacanaachara jana cuhine coataa. <sup>47</sup>Jerichanejeein osa que isharuha inotane, le jerajei inota rocoo. Nenacaeneetejian nii amuritoheriin caohachare le jerajei inota aina Cana Coaunera Cojoanonaa que neeine. Nabana usi que isharuha inotane, <sup>48</sup>nii riano niha natiin ohin, nii usi jacanaachara, naaonjoain jana cuhine coataa. <sup>49</sup>Usi jana situnaa rijijieeinte nichote-richaacheein satiin. <sup>50</sup>Nelatiha niqui tebe. Nete inae lenone cotebetenaa nainenihane, inae nii chaque nelatene. Nii rijijieeinte chaque nelateneeiche inara que icharatenohi ichaain, raotojoeein ichaauruha leeochoaurune jaan ichaeneeichene,” nae jetao acaauru rai Jesoso

**Comasai jianiha cachane que****cache relaa Jesusone***(Mt 19.1-2; Lc 16.18)*

**10** <sup>1</sup>Inae Caferenaaon caje amuhin jetaote, aina nerelanacaauru aina jiniiquiin nuuhe Jorodaan auhaniha cuhin, enoto mitu nichajai

jeloon nenea Jodea batane que cue Jesoso. Ecu jetaote, rai netaojiaauruha cachaaurune jana jetao, nacoaauneein relanajae Jesoso, cachaauru relanaa rautatohane jaun. <sup>2</sup>Nii jana jetaote, rohan nichuuntaain jetao, nechu jataain cairichaauruhane jaanu lera ariha jetao, comasai jianena nainiha cachane bajaare jetao Jesoso caje fariseeocuru tabaauru. <sup>3</sup>Nii jaun jetaote:

“Tonaa inara rai Moisesa, comasai jianiha cachane que,” naain acaauru caje bajaa Jesusone jana jetaote:

<sup>4</sup>“Comasai jianiha cachane caina, jauriaanejeein comasai jianihane jaaque aitiin nenea quiricha teeuchete, aina comasai jianemiin cache,” naainte aite Moisesa,” naauruha fariseeocurune jana jetaote:

<sup>5</sup>“Aiha niqui. Nete, nere tonorana jerelanaala neeichelune jaun, nitohaneein ichaquichene rautaenihane saijieein ichaquichene caina aitelu Moisesa. <sup>6</sup>Nete jauriaanejeein itolere coaunaane nunuheneein, quicha, ene, naaonjoaain coaunaelu Cana Coaunera. <sup>7</sup>Nii jaaunte, inaca, neba, naaonjoain ratiriin amuhin necoansaijiae cache. <sup>8</sup>Chaen leinjiin cachaneein nenea rijijieein coacuhin, jiniiquiin ita aina neeure. <sup>9</sup>Nitohaneein niha cachane caina ichaa Cana Coaunerane jaun, nii comasai jianena nainihe cache,” nae jetao fariseeocuru rai Jesoso.

<sup>10</sup>Inae loreri asaae enooruhane jana jetaote, nii cachaauru relaane jaan bajaare nacoaauneein caje aina nerelanacaauru. <sup>11</sup>Nii jaun jetaote, acaauru rai:

“Comasai jianein leeocho ene raerate, osa que nesaruha aicheein.

<sup>12</sup>Jerichanejeein techu, osa que nesarureein lana jianein leeocho cache que nelanjaane ene,” nae jetao aina nerelanacaauru rai Jesoso.



**Canaanainuru rausiaaeca Jesusone**

*(Mt 19.13-15; Lc 18.15-17)*

<sup>13</sup>Nii jana jetaote, acaauru mucuhin rausiaaeca cojiotanaaca Jesusone coina jetao, rai canaanainuru amaauere acaauru fojiaraauru. Nejetaote, nii canaanainuru amaauruha nii amaauere caohateure nii Jesuso aina nerelanacaauru. <sup>14</sup>Nii rene amanajaauruhane caohateeuruhane coarajejin jetaote, obajejin jetao:

“Coa carene tururuha canaanainurune caohatihachete, canu rene tururuhine. Aihuruha caa canaanainurune rijijieein nenacaauru raineeinte ne Cana Coaunera Cojoanana. <sup>15</sup>Esinæ rauhijiriin aiha leinjiin canaanaine rijijieein neniha cachane coatiha Cana Coaunera Cojoanana que nena nainerinaain,” <sup>16</sup>naane baiha jetao, jerane biji cuhane nii canaanaihuru raane baiha jetao acaauru mucuhin, acaauru rausiaaeca cojiotanajæ Jesuso.

**Jesoso aina iriha leinjiin  
cacha coriquihonane**

*(Mt 19.16-30; Lc 18.18-30)*

<sup>17</sup>Nitohaneein inae jelai caje amunaa jeriha Jesusone jana jetaote, rene jeluhiariin cuhin turuhin jetao, nacatiha neseeriaain:

“Caohachanejei cacha relaera. Cha ichareeun charijibana nitajenaachara ichaonaa raotono que nena nainichaaune coina,” naain Jesoso caje bajaa leinjiin cachane jaun jetaote: <sup>18</sup>“Chanuna caohachanejei cacha neein canu curuuateei, leinjiin Cana Coauneraachate caohachanejeineein ne. <sup>19</sup>Inae raotojoejin Cana Coaunera aitoonjoan coitucuhi: ‘Jiaonriha sonajaain jaohine. Coa ii sinijerane lanaala nena ene aina ichaohin niha. Coa asijiauha. Coa chamute cacha

cairichanaa jerenacaun chuni cacha coacuhin casaje que ereein niha. Chae efojiaraauru ere tonoraain caohachaain acaauru aina neeun,’ naane coitucuhi,” naa rai Jesusone jaun jetaote:

<sup>20</sup>“Aihanu chujian. Canu enamanaca caje coauneeinne jitariin nii naitoonjoan tonoraain ichaon,” naa nii cachane jana jetaote, <sup>21</sup>jataain cairichaojoaain coaraain jetao:

“Esinæ rauhijiriin, chaque lanaelanaala Cana Coaunera aitoonjoa tonorana jereeine, chajaain jitariin nii iicha sirii que necoreteein cairichaihuru rai tenihun. Nii banaachate, jelai amuritoeriin nereein iicha latei dedeeu. Nii baiha laen canu aina uu,” naa rai Jesusone jaun jetaote, <sup>22</sup>jataain nererojoecaain jelai caje amue inaderaain nii enamanaa, jataain coriquihocane jaun.

<sup>23</sup>Nii jaun jetaote, nii rohan curuacaain nenacaauru cachaauru coaraain, aina nerelanacaauru rai jetao:

“Jataainte caaintate Cana Coaunera Cojoanana que nena jeriha coriquihonane,” naa acaauru rai Jesusone jaun jetaote, <sup>24</sup>jataain cojoelatiin ecu aonajeeure aina nerelanacaauru. Nejetaote nacoauneein acaauru rai jetao:

“Cacoelaichaaauru, jataainte caaintate Cana Coaunera Cojoanana que nena jerichaane. <sup>25</sup>Leinjiin oco jachu cuhane situnaa naineniha leinjiin camechone amurijiriinte, jataain caaintate Cana Coaunera Cojoanana que nena jeriha coriquihonane,” naa aina nerelanacaauru rai Jesusone jaun jetaote, <sup>26</sup>jataain jeelai amuritoheriin naurutaain cojoelatiin jetao, ecu nejesinajeein ita rai jetao:

“Nitohanihane nichotenaa naineriaain chuni,” naauruha nii aitohane aonajeeinne jaun jetaote, <sup>27</sup>ecu coaranaacane baiha jetao:

“Caaintatiin cachaauruhacha coaraita, Cana Coaunera rai caaintajene,” naa Jesusone jaun jetaote: <sup>28</sup>“Canacaanune jitariin canacaanuhacha sirii ratiriin ii sacuhacaanulu,” naa rai Fedorone jaun jetaote:

<sup>29</sup>“Chunocoha esinae rauhijiriin canu coreniha, chaen, cacha ichoteratera caitoonjoan- canu ere beebejeein, naaonjoanne caina, rai loreri, rai nejeraauru, rai fojiaraauru, rai calaohichuru, rai natane, naaonjoain ratirichate, <sup>30</sup>caa chauratane que neein jataain jeelai amuritoheriin lefasha saneein rai loreri, rai nejeraauru, rai fojiaraauru, rai calaohichuru, rai natane, naaonjoainuri siricheein. Cairichaerinojoneein neeuruhane niha natiinte, turuha uheni Cana Coaunera Cojoanonaa charijibana nitajenaachara ichaonaa que niha cuurureein. <sup>31</sup>Ena jataain arajii itolere que nelaetoha nocoetonacaaurute, nii chaque nelatelanaala niha cuurureein. Jana ena chaque nelatelanaala arajiiin nenacaaurute, nelateein niha cuurureein,” naain jetao Fedoro tonorae Jesuso.

**Caa quete inae nichata sae orichaaanne biha Jesusone**  
(Mt 20.17-19; Lc 18.31-34)

<sup>32</sup>Jerosaleen nichaae cuuruhane jaun jetaote, aina nerelanacaauru ichoaai-chaniha cuujiha Jesusone jana jetao, cojoelatiin cuujeeuruhane jana jetao, nii niritohane que casiin jetao, cuujeeure acaauru caaijie cunacaauru. Nii jaun jetaote, jelai nii aina nerelanacaauru lechoonca coroatajai cotijiaain jetao:

<sup>33</sup>“Inae caa ena coitucuhichene rijijieeinte, Jerosaleen cuujihacache. Inae ecu turunaate, canu inaraacha cohajei cachaneein nejanoanaa nichaaune mucuhin saseredotecuru curuaanaacuru rai, Moisesa aitoonjoan que cacha relaaureraauru rai,

naaonjoainuri rai caetecuruhane jana, catinanacanejeein nejelau cachaauru Jorionelanaala nenacaauru bijihu caetecurureein. <sup>34</sup>Nii janate, caque necoatijiaain canu couluneein, canu bisiin catinaa cuurureein. Nena nichata janohane baiha, nacoauneein ichanareeunni,” nae jetao nitohaneein teeururichaaanne que Jesuso.

**Acaauru coroatajaniha Jesusone caina caje bajaauruha Saantiaao, Joaan, naaonjoainurine**  
(Mt 20.20-28)

<sup>35</sup>Niritohane jana jetaote, rohan nichuuntaain jetao:

“Cacha relaera, caa ena ichei canacaanuhacha bajaarani ichaainene jerichaanu,” naauruha Sebedeoo calaohichuru, Joaan, Saantiaao, naaonjoainurine jana jetaote: <sup>36</sup>“Chatohanai inara rai ichacaunne jerequiche,” naa Jesusone jana jetaote:

<sup>37</sup>“Canacaanu rai, inae ii Cojoanonaa necaohacha que neeine bana, ii ajaabiji nichajai que, ii raotono nichajai que, naaonjoaain nihacaanune jaanu ichaainene jerichaanu,” naauruhane jana jetaote:

<sup>38</sup>“Coatiha nohane inaraacha bajai coitucuhin aitoheeiche. Caa necairichanaa abaantarichaaunnine rijijieeinooote, necairichanaa abaantanaa nainequiche inara. Chaen noote, nitohanihanune caina cojunacatenohi nichaaunne rijijieein cojunacatenohineein neeiche,” naa acaauru rai Jesusone jaun jetaote:

<sup>39</sup>“Abaantanaa nainichaanu,” naauruhane jana jetao:

“Inarate niqúi, caa necairicharichaaunnine rijijieein necairichanaa abaantaain cojunacatenohineein niha curiquicheein, cojunacatenohineein nihanune rijijieein. <sup>40</sup>Nena laen, canu raotono nichajai que, canu ajaabiji nichajai que, naaonjoaain nelauriaaichene caina inaraacha bajai tenaa naineneun, nii

coina inae acaauru que banihateein rucuhenojoneein nenacaauru raineein nihane jaun,” nae jetao acaauru rai Jesuso.

<sup>41</sup>Niritoha acaauru rai Jesusone aonajein jetaote, Saantiaao, Joaan, naaonjoainuri aina obaaecure nii lechooncaihuri aina nerelanacaauru. Nejetaote, acaauru cotijjaain jetao:

<sup>42</sup>“Inarate raotojoein, Cana Coanera coitucuhichuru, leeochoauru amurijiriin nenea jerein acaauru cocoainanacai neeuruhane que suujua acatein neeuruha leeochoaurune jerein neeuruhane coitucuhiche. <sup>43</sup>Nete laen nejesinajein nitohanein nenea naineneeiche inara. Nitohanein nenea coacuelanaala, nejesinajein ita coroatajanein neeuche. <sup>44</sup>Jana leeochoauru amurijiriin nenea jerera, leeochoauru letononein neeine. <sup>45</sup>Coaracuche nachuhinti canu Cana Coanera Calaohi cacha caje nejanoanaa nichaaunne canu coroatajaneichene coina tururichaaun. Arajii cachaauru osa caje nichotein jianacoon neeuruhane coinane, nii coreniha cajabereoo cairichaeratiha uunlu acaauru coroatajaniha,” nae jetao acaauru rai Jesuso.

#### Maosanihane caje Bartimeeo rautaa Jesusone

(Mt 20.29-34; Lc 18.35-43)

<sup>46</sup>Inae Jericoo turuhin jetaote, ecu basiinjiin neeoriiin jelai caje amuha aina nerelanacaauru aina Jesusone jana jetao, acaauru aina cuure arajiiin cachaauru. Nii jana bero auhaniha lauhequuin coriqui bajaa leinjiin Timeeo calaohi cairichei maosa Bartimeeone jaun jetaote, <sup>47</sup>Nasarete cocoaicha Jesuso nihane aohanriin jetao:

“Rabiriicha foeratei Jesuso, cairichaaoljaain atiin cacoharaau,” naain eheeca nii maosane jana jetaote, <sup>48</sup>arajiiin cachaauru, ehequuin aithane caohateeure inauheneecha nihane coina. Nejetaote, que rutaain ehequuin:

“Rabiriicha foeratei, atiin cairichaaoljaain cacoharaau,” naa nii maosane jaun jetaote, <sup>49</sup>ecu inacuhin jetao:

“Chajaain cajiha cotihanihuche,” naa Jesusone jaun jetao:

“Chajaauje nimichuhinte, toon ii cotihara coarae,” naauruha nii maosa raine jaun jetaote, <sup>50</sup>cajione buri rocohitiiin siheeiitiin ratiriin jetao, Jesuso rene jeluhariin turuha cue nii maosa. <sup>51</sup>Nii jana jetaote:

“Chatohanein chetichaaunne jereita,” naa Jesusone jaun jetao:

“Conoha canotanena jereenra cacha relatera,” naa nii maosane jana jetaote: <sup>52</sup>“Inae jataain quesenetaaine jaun inae conoha inota. Inae nainein amuhinera,” naa rai Jesusone rijieoriitiin jetaote, inae conoha nii maosa notane jaun jetao Jesuso jiniichaaain bero cuhane cue nii maosa.

#### Jerosaleeun turuha Jesusone

(Mt 21.1-11; Lc 19.28-40; Jn 12.12-19)

**11** <sup>1</sup>Nitohanein cuhin, inae Jerosaleen catainaauruhane jaun jetaote, Betafajee, Betania, naaonjoainuri rohan Olibo bichatane turuuruhane jaun jetao, caje coaaneein coroatajai aina nerelanacaauru letoae Jesuso. <sup>2</sup>“Chajaain taa nita canaacha coarajei neseu cunichuche. Inae ecu turuhichenete, ecu cositenojoneein teecoha jaiti chuni cacha amunajanela-naala nenea asno narejeene jana eruha curiquicheein. Cosi rutuhin uhaaichene jana: <sup>3</sup>“Chanosa cosi rutuhin amaaiche,’ naa chunocoha inara raine: ‘Latiha Cana Curuaanaane jaaunne raa uhacaanu. Inae enate ichei jelaiha cainaratereein,’ naauche,” naain jetao letoanajae Jesuso.

<sup>4</sup>Nii jaun jetaote cuhin, nii acaauru rai aithane rijijieein bero auhaniha teecoha cositenojoneein acujua rohan asno narejeene jana, eruhin jetao cosi

rutuhin amaauruhane jana jetao: <sup>5</sup>“Cha ichaquiche inooneein. Chanuna nii asno narejeen cosi rutuhin amaaiche,” naain jetao, acaauru caje bajaure nii cuu nenacaauru cachaauru tabaauru.

<sup>6</sup>Nii jaun jetaote, nii acaauru suujua-teenin letoanajaa Jesusone rijitjoeein nii cachaauru tonoraauruhane jaun jetao, inauhenecha nii asno narejeen amaauruhane coarajeure. <sup>7</sup>Nitohaneein jetaote, nii asno narejeen ichoae cajione tein jetao, Jesoso rai nii asno amaauruhane jana jetao, inae rene turuhaauruhane jana nichoae nelauriaain cue Jesoso. <sup>8</sup>Nitohaneein asno ichoae nelauriaain cuhane jana jetaote, najiniha bero cuhane rai cajione buri maririjacoaauruhane jana jetao, leeochoaauru elele alo rijijieein nenea ajaena alo raain najiniha bero cuhane maririchure. <sup>9</sup>Nii jana najiniha cunacaauru, caajie cunacaauru, naonjoainuri jetaote:

“Raotojoein turuhine Cana Coaunera rijijieein nenea cana Curuaanaa.

<sup>10</sup>Raotojoein turuhine Cana Coaunera Cojoananaa, cana inoaensihuru foerate-raneein nenea Rabiri nefoerate cojoananaa. Aihute coreniha raotojoein neurumiin dedeeu nenacaaurune maajein,” naaure jetao cojioriin cachaauru.

<sup>11</sup>Nitohaneein Jerosaleen turuhin jetaote, Teenforo asaae enohin, ecu basijiiin neoriiin jitariin nasajai coaraane baiha jetao Betaniau cue lechoonca coroatajai aina nerelana-caauru aina Jesoso, inae sohane jaun.

**Inacaelanaala oha uherane  
coina cojiotaa Jesusone**

*(Mt 12.18-19)*

<sup>12-13</sup>Nii cojoanoo Betania caje amuuruhane jana jetaote, niita bero auhaniha niha uhera alone jana

coaraain jetao, coaraa cue Jesoso mijiintohane jaun. Nejetaote, inaacane bana rijiu nenihane jaun, ninaa colane nalohacha baajejein ne. <sup>14</sup>Nitohaneein inacaenihane jaun jetaote:

“Inae nacoaauneein inacaeneriquinne jaun, neriaain chuni ii inaa lerata,” naain uhera cojiotaa Jesusone jana jetao, ecu aina neein aonajeure aina nerelanacaauru.

**Teenforo asaae necoretenacaauru  
sitaa Jesusone**

*(Mt 21.12-17; Lc 19.45-48; Jn 2.13-22)*

<sup>15</sup>Inae nacoaauneein Jerosaleen turuhin jetaote Teenforo asaae enohin, nii Teenforo asaae chaelai que necoreteein, chaelai coretiha, naaonjoainin nenacaauru sitaain, atanichoae coriqui coreeuruha cachaauru raine jaa rorihurune maajein lacojoaain jetao, serori que necoretenacaauru rorihurune maajein lacojoaain, <sup>16</sup>nii Teenforo asaae nenacaain rucuhele enoaauruhane caohate Jesoso. <sup>17</sup>Nitohaneein jetaote:

“Cana Coaunera Quiricha inoaensi cuhanete: ‘Cana Coaunera bajaauruha satiin chauratane sacuritaain que nenacaauru cachaaurune jaan colohereineite ne canu loreri,’ naain laenanohineein ne. Nete asijiaauruhane jaan coloheri rijijieein teiche inara,” naain jetao ecu acaauru relae Jesoso.

<sup>18</sup>Niritiin cachaauru relaane aonajein jetaote, Jesoso sohin jaonaa coaaucu-ruhane jaun, sohin jaauruhane jaanu lera arihure saseredotecuru curuaanaa-curu, Moisesa aitoonjoanque cacha relaaureraauru, naonjoainuri. Ne jetaote, sohin jaauruhane coasichure, nii acaauru relae Jesusone jaan rautatiin aonajeuruha satiin cachaaurune jaun.

<sup>19</sup>Inae nocohecane jana jetaote, aina nerelanacaauru aina jiniiquin nii nese caje amue Jesoso.

**Inacaelanaala oha uherane***(Mt 21.20-22)*

<sup>20</sup>Nii cojoanoo janone nii uhera rohan situha cuuruhane jana jetaote, inae cojoaisi aina curuaaequin oha nii uherane jana coaracure. <sup>21</sup>Nii jaun jetaote, cojiotaa Jesosone coacuhin que nainaan jetao:

“Cacha relaera, inae raca cojiotaaine jaunte, inae ohe taa uhera. Coaraau nachuhinti,” naa Fedorone jaun jetaote:

<sup>22</sup>“Jataain Cana Coaunera esenetaauche. <sup>23</sup>Chunocoha esinae rauhijiriin airichainne esenetaain nii batoelanaala: ‘Niilai caje nefaruhin cucuana cuhane cunihun,’ naa caa ichtane ucuuno rainete, esinae nii aithane rijijieein aihane ne. <sup>24</sup>Nitohanihane jaunne inara rai aitoon, inaraacha latei eruhichene coina Cana Coaunera bajaache, inara rai terichaine esenetainete eruriquicheein. <sup>25</sup>Inara rai chatohanai cotainacai ichaain neeruha inara amute cachaaaurune niha natiin, acaauru que inara suujua acateein Cana Coaunera bajaachene bajaache. <sup>26</sup>Aihute baaso ichaain osa que nesaruquichene niha natiin inara osa que suujua acatemiin cana Inaca dedeeu nena Cana Coaunera,” nae jetao Fedoro rai Jesoso.

**“Cha ii cocoainae,” naauruha Jesoso raine**

*(Mt 21.23-27; Lc 20.1-8)*

<sup>27</sup>Nii baiha jetaote, nacoaauneein Jerosaleen cauha cue aina nerelana-caauru aina Jesoso. Inae ecu turuhin Teenforo asaae enohin amuhemuheca Jesosone jana jetaote, rohan nichuuntaain jetao:

<sup>28</sup>“Cha ii cocoainae catohanai ichaain neeine coina. Chatohanai cocoaainacai neinna neei,” naaure jetao Jesoso rai

saseredotecuru curuaanaacuru, Moisesa aitoonjoan que cacha relaaureerauru, Jorioocuru bichauhenaauru, naonjoainuri.

<sup>29-30</sup>Nii jaun jetaote, acaauru rai: “Canuhetonaine inara caje bajareeunni. Cha Joaan letoaelu, cachaauru cojunacatiha uhane coina. Cana Coaunera letoaenihanena cachaauruhacha letoanojineein uhalu. Catoonraain carai beeichenena, canuhetonai canu cocoaainain canu letoaera bereeunni inara rai,” naain jetao acaauru tonorae Jesoso.

<sup>31</sup>Nii jaun jetaote, ecu nejesinajeein ita rai jetao: “‘Cana Coaunera letoanojineeinte uhelu,’ naacachenete: ‘Chanuna jana nere tonoraain esenetae-neeichelu,’ nareein. <sup>32</sup>Coatihachu: ‘Cachaauru letoanojineeinte uhelu,’ nanaa nainihaacache,” naaure jetao ita rai. Satiin cachaauru Cana Coaunera letoanojineein uhalu Joaane esenetaauruhalune jaun, cachaauru coasiha. <sup>33</sup>Niritiin jetaote:

“Chachaainti Joaan letoaain nelu. Coatiha coitucuhaacaanu,” naauruha Jesoso raine jaun jetaote:

“Aihane jaaunchujian canuhetonai, caa catohanai ichacaanne coina canu cocoaainain canu letoaera berinaaunni inara rai,” nae jetao acaauru rai Jesoso.

**Ocoana jaaurera necha ansaineein****ichaonacaauru que cuaain****cachaauru relaa Jesosone***(Mt 21.33-46; Lc 20.9-19)*

**12** <sup>1</sup>Niritohane baiha jetaote, ocoana jaaurera que cuaain cachaauru relaain jetao: “Leinjiin cacha jetaote, ocoana jaain jitariin corihateein bino jaauruhane jaanu coloherinu que loreri jaain, leinjiin jataain ucuuneein teein rori jae ecu neein amihanena-caauru beraihane coina. Nitohanein

caohachaaïn rucuhecane baiha jetaote, nii ocoana que amihanenacaauru rai atane tein ratiriin amuhe nii atane erora. Inae tainaca que turuhane bana ita rai lerruuruhane caina. <sup>2</sup>Nitohanein tein ratiriin jetaote, inae tainaca que tihane jaun, leinjiin rai cacha letoae, nii amihanenacaauru caje que banihatein niicha taihuri bajaa cuhane caina.

<sup>3</sup>Nejetaote, nii cacha mucuhin faojaain sooruhane baiha, nii cacha letoaaure cha colane nii temule erora rene. <sup>4</sup>Nii jaun jetaote, nacoaaunein leeocho cacha letoaa nii temule erorane jana, nocoejechanuhin, couturi cunaitaain cha colane acaentonai letoaaure jelaiha. <sup>5</sup>Nii jana nacoaaunein leeocho cacha letoaaure jana jetaote, acaentonai sohin jaaore nii temule beraichacuru. Nii baiha nacoaaunein arajiin rai cachaauru letoajeein sacuha nii temule erorane jana jetaote, tabaauru sohin jaonajaain, tabaauru faojaain cunaita-najaare.

<sup>6</sup>Satononejeein jetaote leinjiin jataain niicha belaaï rai calaohi neeorihane jana, aca letoae: ‘Jerihane canu calaohi quete laen suujua acatecurureein,’ naain coaacane jaun, sohin jaoruhane esenetaelanaala. <sup>7</sup>Nejetaote, ita rai jetao: ‘Inae uha caa atane erora calaohi. Coanete sohin jaohacachete, cana rainein nedaaïne caa atane,’ naaure jetao nii ocoana que amihanenacaauru cachaauru, uha nii atane erora calaohine jana coarajeein. <sup>8</sup>Niritocuruhane jaun jetaote, inae acauru rene turuhane jana mucuhin ateinaain nii ocoana udaa amaain jaberoco jaaore,” naain jetaote:

<sup>9</sup>“Tonaquiche jana inara, nii calaohi sohin jaaoruhane que, tohanrihacha jana nii ocoana erora. Raajenihane cuhinacha nii ocoana que amihanenacaauru sohin jaohin, leeochoauru

cachaauru bijiu nii ocoana teriha beraihuruhane caina. <sup>10</sup>Tana Cana Coaunera Quiricha inoaensi cuhane:

‘Ajeri jaolecooruha  
loreri icharaaurune jaante,  
jauriaanejeein  
loreri nunuhenein ne.

<sup>11</sup>Acate  
jataain cana rai  
cojoelanaacojoaain ichae  
Cana Coaunera,’

naain laenanohinihane jaan reretaain aonaquiche chariji banane,” naain jetao ocoana icharaauru que cuaain cachaauru rai ereerejeein acauru relae Jesoso.

<sup>12</sup>Niritiin acauru que cuaain relanajaa Jesosone que nainacuruhane jaun jetaote, Jesoso mucunaa jerecure Moisesa aitoonjoan que cacha relaaure-raauru, saseredotecuru curuaanaacuru, naonjoainuri. Nejetaote, Jesoso aina neeuruha arajiin cachaaurune jaun cachaauru coasiiha ecu ratiriin jelai caje amuure.

*Impoestonu que coriqui teeuruhane  
que iriha Jesusone  
(Mt 22.15-22; Lc 20.20-26)*

<sup>13</sup>Nitohanein ecu ratiriin jelai caje amuuruhane baiha jetaote, Erodesi ere tonoraeraauru, fariseecuru, naonjoainuri letoaaure, rai ereeuruhane jana tonaain acauru tonoraa Jesusone nechua jataain coulurujuueeuruhane jaanu lera ariha cuuruhane caina. <sup>14</sup>Acauru jetaote rene turuhin jetao: “Ii que tonaain iriha cachane niha natiin, tonoraelanaala esinae rauhijiriin ereein neeine coitucuhacaanu. Chaen techu nohanelanaala esinae rauhijiriin jeriha Cana Coaunerane rijijiein ichaoha cachane caina cacha relaaï. Aihane jaun, caohachaana Romano-curu curuaanaa rai *impoestonu* que coriqui tihacaanune. Ainihane chatohaneriha.

Coretena nainichaanuna. Ainihanena niriirih, ” naaure jetao Jesoso rai fariseoocuru aina Erodesi ere tonoraerauru.

<sup>15</sup>Nejetaote, nechú jataain cairichaa aitocuruhane que nainaane jaun jetao:

“Chanuna cacairichanaa coacuhin niritiin carai ereeiche. Carai cajihá nii coriqui uhaauchene coarae,” naa acauru rai Jesosone jaun, <sup>16</sup>rai coriqui teeuruhane jana jetaote: “Chaa curuaa caa laenanohineein ne rai cojunaca aina,” naa acauru rai Jesosone jaun jetao: “Romanocuru curuaanaa enferadoro curuaa,” naaure jetao rai.

<sup>17</sup>Nii jaun jetaote acauru rai: “Aihana jaun chujian enferadoro que banijiaain nena teeuche enferadoro rai. Chaen Cana Coaunera que banijiaain nena teeuche Cana Coaunera rai,” naain acauru tonoraa Jesosone jaun jetaote, ecu jataain cojoelatiin aonajeure.

**Ohane baiha oo caje ichanaa cachane  
bajaauruha sadoseeocurune**  
(Mt 22.23-33; Lc 20.27-40)

<sup>18</sup>Nii jana jetaote, Jesoso coaraa uure sadoseeocuru, oo caje ichanaa cachaa suujuene esenetaaurenihane jaun caje bajaauruhane caina. Acauru jetaote rene turuhin jetao:

<sup>19</sup>“Cacha relaera, Moisesate canacaanu rai laenaain ratirilu, oha leinjiin cachaa nesirihateein nii comasai aina canaanai sirilanaalane, nii onaa comasai autana raa nii onaa nejeraane, nii onaa aina siricha rijijieein canaanai sirihane caina. <sup>20</sup>Nitohanihane janate, ita nejera nejesinaneein neuruha caaunsineein cachaurune jana, jauriaanejeein acauru nejera nesirihateein, nii nesirihatenajan aina calajoilanaala ohe. <sup>21</sup>Nii jaunte, nii autana rae nii onaa nejera. Nete acentonai ohe aina calajoilanaala. Jerichanejeein techu ohe nii acauru nichataja. <sup>22</sup>Nii jaunte, nii chunocohacuru nii caaunsini ita

nejeraauru calajoilanaala oore. Nii janate tabiicha nii ene netonai ohe. <sup>23</sup>Aihane jaun ooruhane baiha nacoaauneein ichanaa acauru suujuene bana, chariji comasainein jana nereein nii ene, caaunsini ita nejeraauru aina nesirihateein nihalune jaun,” naain jetao Jesoso caje bajaure sadoseeocuru.

<sup>24</sup>Nii jaun jetaote:

“Nechu jataain joaaneereinte ereereequiche inara, Cana Coaunera Quiricha ereretaain aonaain niicha ichanenu coitucuneeichene jaun. <sup>25</sup>Ohane baiha jerichanejeein jaberoconeein nena rijijieein ichanaain niha quichaauru, enecuru, naaonjoainuri suujuene, inae nesirihatenaa nainecuruhi, dedeeu nena anjeraauru rijijieein inae neeuruhane jaun. <sup>26</sup>Tana ohane baiha jerichanejeein jaberoconeein nena rijijieein ichanaa cachaa suujuene que aitoaha nuna laajoiri moconau neein Moisesane jaa quiricha reretaain aonaquiche inarane. Ecu jetaote Moisesa rai: ‘Canune Abaraau, Isaca, Jacobo, naaonjoainuri Coaunera neeun,’ nae jetao Cana Coaunera. <sup>27</sup>Coatiha ohin nitajenacaauru coaunera nihei Cana Coaunera- ohin nii baiha jerichanejeein jaberoconeein nena rijijieein nenacaauru cachaauru coaunera Cana Coaunera. Nitohanihane jaunte, jataain joaereein nii cha coitucuelanaala ereereequiche inara,” naain jetao sadoseeocuru tonoraa Jesoso.

**Cana Coaunera aitoonjoan- jataain cachaa  
ichao rai nelateein nena**  
(Mt 22.34-40)

<sup>28</sup>Niritiin esinae rauhijiriin sadoseeocuru tonoraa Jesosone jana aonajihane jaun jetaote, Jesoso rohan nichuuntaain jetao:

“Chariji jataain jauriaanejeein Cana Coaunera aitoonjoanein cachaa ichao rai nelateinein ne,” nae jetao, rai Moisesa aitoonjoan que cachaa relaera.

<sup>29</sup>Nii jaun jetaote:

“Jauriaanejeein cana ichao rai nelateein nena Cana Coaunera aitoonjoante: ‘Aonacuche Israeli cocoaichacuru. Cana curuaanaa Cana Coaunerate, leinjiin acaacha itolere curuaanaa neen ne. <sup>30</sup>Aihane jaun, ii suujua, ii suujue, ii coichana, naaonjoainuri aina curataain cana curuaanaa Cana Coaunera belaihu. <sup>31</sup>Chaen ichaajenhane ijiabereeo belain coaraane rijijieein chamute cacha belain coaraau,’ nae. Nihei caa baiha jataain cacha ichao rai nelateein nei Cana Coaunera aitoonjoan,” nae jetao Moisesa aitoonjoan que cacha relaera rai Jesoso. <sup>32</sup>Nii jaun jetaote: “Esinae rauhijiriinte chuhisi aithochica cacha relaera. Leinjiinte chuhisi ne Cana Coaunera. Nihei nii baiha acaneein nei. <sup>33</sup>Cana suujua, cana suujue, cana coichana, naaonjoainuri aina curitaain Cana Coaunera belain, cana jaberoco belaichaane rijijieein cana amute cacha belain, naaonjoaancanete chuhisi, itolere inihocuru, itolere jujuaihuru, naaonjoainuri mocohaca rori ichoae teenne amurijiriin jataain nelateine,” nae jetao Jesoso rai Moisesa aitoonjoan que cacha relaera. <sup>34</sup>Niritiin esinae rauhijiriin tonoraa nii Moisesa aitoonjoan que cacha relaerane coitucuhane jaun jetaote:

“Coatiba icharaain niheei Cana Coaunera Cojoanonaa que neeine caina,” naa Jesusone jaun jetaote, inae nii tonaai caje chatohanai bajanaa coitucue.

**“Chatohanai caje nefoeratenaa ne Mesihasi” naain bajaa Jesusone**  
(Mt 22.41-46; Lc 20.41-44)

<sup>35</sup>Nii baiha Teenforo asaa neein cachaauru relaane jaun jetaote:

“Chanuna Rabiri caje nefoeratenaa niha Mesihazine que aitocure Moisesa

aitoonjoan que cacha relaaureerauru.

<sup>36</sup>Cana Coaunera Suujue aitoroatenojieein:

‘ “Cau carautono nichajai que nelauriaau carohan, ichei nejeratenacaauru amuritoherateein, itiha asaa tenajaanune reen tiaajeein,”

naa Cana Coaunera cana curuaanaa rai,’ naa Rabiri inatiin.

<sup>37</sup>Aihane jaun, inasiina Rabiri nefoerate caje nenaanere Mesihasi, Cana Curuaanaa neein curuaatiba Rabiri netonai inatiin,” naa cachaauru rai Jesoso jana jetaote, rautatiin Jesoso aonajeure nii ecu arajiin nenacaauru cachaauru.

**Moisesa aitoonjoan que cacha relaaureerauru ichao biha Jesusone**  
(Mt 23.1-36; Lc 11.37-54; 20.45-47)

<sup>38</sup>Nitohaneein cachaauru relaane aina cuaain jetaote:

“Caohachaain nocohalajiin ichaaoche, Moisesa aitoonjoan que cacha relaaureerauru que. Cacha relaauruhane jaa cocajione jiaainte, bero cuhaneuru acaauru que suujua acatecuruhane coarateein neeuruha cachaaurune jereinchuru amuure. <sup>39</sup>Chaente netaojiaain Cana Coaunera rai raudi que ereereecuruhane jaan coloheri sinacoca asaa enooruhane jataain nelateein nena rijijieein rori caohacha ichoae nelauriana rautatiin, beseta ichaain lenonecuruhane jaun niha natiin rori caohachaauru ichoae nelauriana rautatiin aihure. <sup>40</sup>Chaentechu, autanaauru caje acaauru lorero niha natiin ruluure. Nitohaneinte necha aansaneein ichaauruhane que nainacuruha cachaaurune coataa sonafaajianaichuru Cana Coaunera bajaae bajajeein ichaao. Acaaurute



leeochaauru amuritoheriin caseteco coaraa cuurureein,” naain jetao cachaauru relae Jesoso.

**Nichaonajaanu que niicha sirii coriqui tiha Cana Coaunera belaiha leinjiin autana cairicheine**

(Lc 21.1-4)

<sup>41</sup>Nii jana jetaote, coriqui teeuruhane jaan curu cuhane coriqui teeuruha cachaaurune jana corajihua lauhequuin Jesosone jana jetao, jataain araainanaain coriqui teure coriquihonacaauru.

<sup>42</sup>Nii jana jetaote, turuhin jataain coroatajajeei coreein nenea coriqui tiha cue, nii teeuruhane jaa curu cuhane ita que jerajeein, leinjiin autana jataain cairichei. <sup>43</sup>Nii coarajeein jetaote, aina nerelanacaauru cotijaain jetao:

“Esinæ rauhijiriin satiin caa curu cuhane coriqui teurera amurijiriinte coriqui te caa leinjiin autana cairichei. <sup>44</sup>Jana satiin caa coriquihonacaaurute, acaauru rai cautena coriqui caa teure. Nete laen caa ene jataain cairicheinijian natiin, acaihanijin nichaonajaanu que niicha sirii te jitariin,” nae jetao acaauru rai Jesoso.

**Itajenojoinerichaaain Teenforone biha Jesosone**

(Mt 24.1-2; Lc 21.5-6)

**13** <sup>1</sup>Inae nii Teenforo caje mituha cuha Jesosone jana jetaote rai jetao:

“Cacha relaera, jataain caohatiin ajeri caje ichanohiniha caa Teenforone coaraaina,” naa rai aina nerelanacaauru caje leinjiine jaun jetaote:

<sup>2</sup>“Jataainte niqui caohatiin tasiojoaain ichanohineein coaraai. Nete inae turuha cojoanonaane bana, nii leinjiinijin nenereein caa ajeri ita ichoae teein ichanohineein inaraacha coarajei, satiin itajenojoiniha curichaine jaun,” naain jetao aina nerelanaa tonorae Jesoso.

**Nacooauneein tururichaaain Cana Coaunera Cojoanonaane**

(Mt 24.3-28; Lc 21.7-24; 17.22-24)

<sup>3</sup>Nii baiha jetaote, nii Teenforo coarajeein rohan nenea Olibo bichataneu cue jetao aina nerelana-caauru aina Jesoso. Inae ecu turuuruhane jaun nelauriariin lauhecoha Jesosone jana jetaote:

<sup>4</sup>“Chatohanai janonaa banana nunuhereein nitohanai. Chatohanaina jana, inae jataain cataainjian nitohanaine jana coaarareein,” naain caje bajaauruha jelai teteriin, Fedoro, Saantiaao, Joaan, Anderesi, naonjoainurine jaun jetaote: <sup>5</sup>“Inara coritaain niha chunine coataa caohachaaain nainaan neeuche.

<sup>6</sup>Arajiichurute canuniha nocoetiinchuru turuhin: ‘Canune Curisito neeunra,’ naa uuruhane, arajii cachaauru nii acaauru coritaauruhane esenetaa cuurureein.

<sup>7</sup>Jiaonriha: ‘Ecuuru ecuurute ne sonaana,’ naain coitucuhichene nesooneein casiichene. Nitohaneente nunuheca cureein. Nete caa caitoonjoan cojoanonaa satono que turuhane jaun ainereein. <sup>8</sup>Laurihu laurihu nenacaauru cachaaurute, leeochoauru aina nejeratein, ita que nererojoecaain niha cuurureein. Jana leeocho atane que ichaonacaaurute, leeocho atane que ichaonacaauru aina sonaana que niha cuurureein. Chaentechu araai lauriin aihane jaanru, jataain mijiaaaineein niha cureein carora tabai. Nii janate, niha cureein mijitena. Niite aasaariin necairichanaa nunuheniha cureein.

<sup>9</sup>Aihane jaun caohachaaain nainaan neeuche. Canu corenihate, cocoainana-caihuru, reychuru, naonjoainuri bijiu inara teeuruhane janate, sinacocacuru asaecuru teein inara bisiha cuurureein. Nitohaneein inara teeuruhane banate,

esinae rauhijiriin canuneein nihanune biha curiquicheein acaauru rai. <sup>10</sup>Jaiti nitohaneein satono que turuenihane ajinihate, satiin cachaauru chauratane sacutaain lauri lauri nenacaauru rai caa caitonjoan nosa caje nichoteeururi-chaaine beebejiha curiquicheein.

<sup>11</sup>Aihane jaun, cocoinanacaihuru rene inara amaauruhane, jiaonriha acaauru rai ereeichene jaaque tonajeein cuichene. Inae ecu ereeichene coina turuhichene coatiha inara aitoriheei-cheein. Cana Coaunera aitoroatenojoin Cana Coaunera Suujue letononeeinte aitoriquicheein. <sup>12</sup>Rai nejeraauruhachate nejeraauru colurujiha cuurureein ateinanohineeuruhane coina. Jana rai calaohichuruhachate colurijiha cuurureein acaauru inacaauru. Nii janate rai inaca colurujeeuruha acaauru calaohichurune jana, acaauru ateinaa cuurureein. <sup>13</sup>Canu cachaneein neeichene corenihate inara cotaairiin inara coaraa cuurureein satiin caa chauratane sacuritaain nenacaauru cachaauru. Nete nitohaniha sainejeein satono que tiaain caitoonjoan tonoraain neite ichoteratenojoiniha cureein.

<sup>14</sup>Aihane jaun caa reretaain aonaain tonoraauche. Inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratanaa casicheine coaraquichene, ichatane jana cuhin sorooruhine Jodea ichaonacaauru. <sup>15</sup>Ecuun rai loreri satono coarana ichoae niha chunine jana niha nitohanane, jiaonriha rucuhele niha natiin roconaa coaacane. Rauhijiriincha fauhi amuhine. <sup>16</sup>Jana ocoana jana nihane jana aihane, jiaonriha jelaiha nejenohin cajione ranaa coaacane. <sup>17</sup>Jataainte cairichaaajoaurureein nii cojoanonaa que inae turuhane bana ausirineein nenacaauru enecuru, sisihajein

canaanai sirichaaauru, naaonjoainuri.

<sup>18</sup>Nabana elohena bana niha nitohanane coataa Cana Coaunera bajaauche inara. <sup>19</sup>Cana rai chauratane coaunaain nihalu Cana Coaunera baiha, nitohanai necairichanaa coaraa chariji banane que airiijiinte, jataain niha cureein necairichanaa cojoanonaa. <sup>20</sup>Nii necairichanaa cojoanonaa sarotiaeniha Cana Coaunera, nerihei chuni nichotei nii caje. Nete rai cachaneein janijiin niicha ranojoinunri jataain belaihane jaun, nabana nitajeeuruhane coataa nii cojoanonaa sarotiareein.

<sup>21</sup>Aihane jaun chunocoha inara rai: ‘Caute ne Mesihasi. Ecute ne,’ naa inara rene turuhinne, jiaonriha esenetaaichene. <sup>22</sup>Mesihasi niha nocoetiinchurute *profetane* lanaala nenacaaurune maajeeichuru, inara coritaa cojoelanaa-cojoai ichaa cuurureein. Janijiin Cana Coaunera ranojoinuru niha natiinte coritaaurureein. <sup>23</sup>Aihane jaun, caohachaaain necohalajiin itolereenein neeichene coinane caraajenhane inara rai aitoon, que nainaan neeichene coina,” nae jetao aina nerelanacaauru rai Jesoso.

**Nacooauneein tururichaain cacha caje nejanoanaa Curisitone**

(Mt 24.29-35, 42-44; Lc 21.25-36)

<sup>24</sup>Niritiin jetaote: “Nitohaneein inae niha necairichanaa cojoanonaane baihate, nocoena niha enotone jana, atene netonai coenereein. <sup>25</sup>Nii janate, dede cajene maajeeichuru naluhacooa arasijieeurune jana, nesoone caaun rijijijianiha cuurureein dedeeu nenacaauru netonai. <sup>26</sup>Nitohanihane janate, itolere ichana nainihane coarateein nelate que nelateein dede sacari jana fauha uhanu canu Cana Coaunera Calaohi cacha caje

nejanoanaa nichaaunne jana coariquicheein. <sup>27</sup>Acate rai anjeraauru letoareein, nii janijiin niicha raauri, rai cachaauru taojiaain raauruha satiin caa chauratane tinoritiin nuurihuru cajeeurune maajein, dede uurihuru cajeeurune maajeichurune coina.

<sup>28</sup>Caohachaaain nainacuche, caa uhera que cuaain inara relaunne que. Inae satiin naluha nune alone baiha nacoaunein nalojoaa uherane coaraqichene, caje inae nichuuntaa ajaanaane coitucuhiche. <sup>29</sup>Nii rijijieein nainacuche caa caitoonjoan rijijieein aihane coaraqichene, canu Cana Coaunera Calaohi cacha caje nejanonaa nichaaune inae nichuuntaa turuhanune que.

<sup>30</sup>Esinae rauhijiriine aitoon, jaiti ooreniha ena caa satiin canu aina nenacaaurune janate, <sup>31</sup>nitajereein caa chauratane aina dede. Nete lae caa aitocoaaunne jaa quere, caa aitocoaaunne rijijieein que tihane reentiaain nereein.

<sup>32</sup>Nete laen: ‘Naaonjoain cojoanonaa banate ecu tiaain aicheein,’ nene naain nii chuni coitucuera. Niheichu dedeeu nenacaauru anjeraauru niha natiin coitucuruhi. Niheichu canu niha natiin coitucuhaaun, leinjiin Ofaachate coitucuuje. <sup>33</sup>Niique tihaneree tiaain caohachaaain nainaaain Cana Coaunera bajajeein neeuche. Coatiha coitucueraai nii airichaaaine jaa cojoanonaa. <sup>34</sup>Acate coriaji ataneu cunaa jeriha leinjiin cachane, rai cachaauru que loreri beraichatein, le cacha cachaauru rai amihanenaa tein, nii loreri beraicha que beraichtenajaain ratirinajaain amuhane rijijie. <sup>35-36</sup>Aihane jaun, caohachaaain nainaaain turuhane cohajeein neeuche inara. Coatiha coitucueraai turuha nii loreri erorane, sona naluque, dede cataaun, ataohari irihanau, janone, naaonjoainjijn,

turuhane jana letona jatoroaaain neneichene coataa. <sup>37</sup>Caa inara rai aitocoaaunne rijitoeine leeochoauru rai netonai aitoon, caohachaaain nainaaain cohaquichene coina,” nae jetao, Fedoro, Saantiaao, Joaan, Aanderesi, naaonjoainuri rai Jesoso.

**Jesoso mucuuruhane coina  
ita taojiaauruhane**

(Mt 26.1-5; Lc 22.1-2; Jn 11.45-53)

**14** <sup>1</sup>Coroata janohin lanajeeca jorerera colane ichanohin faan quihuruhane jaan beseta fasocoane jana jetaote, chunocoha que coritaeratein, Jesoso mucuhin ateinaauruhane jaan lera arihure saseredotecuru curuaanaa-curu aina Moisesa aitoonjoan que cacha relaaureraauru. <sup>2</sup>Nii jana tabaauru jetaote:

“Nainihe nitohanai ichacaache beseta nunuhe banane. Nabana cana que nejerateeuruha ecu aina nenacaauru cachaaurune coataa,” naaure jetao ecu ita rai.

**Alabastro caje ichanohi que curuhin  
nena jujuai choroha leinjiin ene  
Jesoso ichoaene**

(Mt 26.6-13; Jn 12.1-8)

<sup>3</sup>Betaniau cosibi ruhecaeranein niicha curuaatehuri Simoon loreri asaa turuhin, ecu nelauriana najaan rori choae lauhecoha Jesusone jana jetaote, *alabastro* caje ichanohi que curuhin-juane nejesina caje ichanohi jataain coretiin nena jujuai nardo amaain turuha cue leinjiin ene. Nitohanein turuhin jetaote nii jujuai curu raiheitiin Jesoso couturi choae chorohe. <sup>4</sup>Nii jana ecu neein coarajeeurera tabaauru jetaote obajeein jetao:

<sup>5</sup>“Chanuna que cairichaihuru coroatajana richaae, nichata fashai denario corejeeoni amurijiriin nii jataain coretiin nena

jujuai nardo que necoretelanaala joaereen nii jujuain ichanohi jaohiche,” naain jetao nii ene que ereein nocoeje chanuure. Nii le denario jetaote le jiichoo amihanenaa core ne.

<sup>6</sup>Nii jana jetaote acaauru rai:

“Coa nocoeje chanuhin, coa rohecaache. Jataain caohachate ichae catohanein canu tein. <sup>7</sup>Itolere banate inara aina neurureein cairicheihuru. Nii jaunte, acaauru coroatajanena jeriquichene jaan que, acaauru coroatajanena naineriquicheein. Jana canu, itolere cojoanonaa bana inara aina neriaauni. <sup>8</sup>Caa enete niicha ichana nainei ichae, cajabereoo jujuaauruhane jaanu que niicha rucujui nihane jaun. <sup>9</sup>Esinae rauhijiriine aitoon. Chunijihunru chauratane sacuritaain nosa caje nichoteeuru richaaine coina caitoonjoan canu ere beebjeeuruhanee jaunrute, caa catohanein canu jaberoco jujuaa caa enene jaan coaauca cuurureein. Nitohaneinte coaanojoi niha cureein,” nae jetao acaauru rai Jesuso.

#### **Jesoso coulurujia Jodasine**

(Mt 26.14-16; Lc 22.3-6)

<sup>10</sup>Nii Jesuso aina nerelanacaauru lechoonca coroataja Jodasi Isacariote jetaote, saseredotecuru curuaanaacuru coaraa cue, acaauru aina ereein, Jesuso rene amanajaane coina. <sup>11</sup>Nitohanein acaauru rene turuhin amanajaane coina acaauru rai aitoha Jodasine jaun jetaote, jataain coroajeein rai coriqui tenaa jerecuruhane jaun, jelai nedaaorihia Jesusone que coacue, rene amanajaane coina Jodasi.

#### **Aina nerelanacaauru aina janotiin lenoniha Jesusone**

(Mt 26.17-29; Lc 22.7-23; Jn 13.21-30; Co I 11.23-26)

<sup>12</sup>Jorerera colane ichanohin faan quiin, Cana Coaunera rai carenero

narejeen sooruhane jaan fasocoa beseta cojoanonaa nunuhe bana jetaote:

“Chu fasocoa cojoanotiin que lenonichaachene jaanu que lenone jaa cuhacaanune jereeii,” naain jetao Jesuso caje bajaauure aina nerelanacaauru.

<sup>13</sup>Niritocuruha raine jaun jetaote, coroatajai aina nerelanacaauru letoaain jetao:

“Chajaain taa neseu cunichuche. Inae ecu turuhichene jana, baichaje cuhane acau baaibaachaain cuujuiha leinjiin cachane jana eruhichene sacuuche.

<sup>14</sup>Chaen inae loreri asaae enohane, nii loreri erora rai: ‘Cacha relaerate ii caje bajaerate, Chariji ucuha cuhane canu aina nerelanacaauru aina lenonerichaanuhin fasocoa cojoanotiin que, naain bajaerate,’ naaiche rainete, <sup>15</sup>aca inara que ecuunetiin coaranai loreri asaae, caohatiin rucuhenojoneein nena ucuha seejoan coarateerein. Chaen inae inara que coaratihia nii loreri erorane, ecu tein janotiin cana lenonenu enoalaauche,” naain jetao, nii aina nerelanacaauru suujuateein letoanajae Jesuso.

<sup>16</sup>Nii jaun jetaote, nii neseu cuhin acaauru rai aitoha Jesusone rijijieein leinjiin cacha eruha cuure nii coroatajai aina nerelanacaauru. Nii jana jetao acaauru que leinjiin ucuha coaratihia nii cachane jaun, ecu tein fasocoa cojoanotiin que lenonecuruhane coina lenone jaauure.

<sup>17</sup>Inae nocoejihane jana jetaote ecu leeochoaauru aina nerelanacaauru aina turuha cue Jesuso. <sup>18</sup>Nitohanein lenonecuruhane jaanu neein jetaote:

“Esinae rauhijiriin ena cau caniha inara jiniichaain lenoniha nenaate, canu que nesujueein cacoluruheca cureein,” naa acaauru rai Jesusone jaun jetaote, <sup>19</sup>jataain inaderaain:

“Canuna ii coulurujerichaaunte,” naain caje bajaauure le cacha cachaauru. <sup>20</sup>Nii jaun jetaote:

“Ena, cau canu aina lechoonca coroatajai nequichene caje nenea, canu jiniichaain canu ojoaichu cuhane faan setejiaain quichate acane. <sup>21</sup>Cana Coaunera Quiricha inoensi cuhane aithohane rijijieein itolereneein aihanete ne. Nete jataain cairichaaajoareein nii caque nesuujueein cacoluruhera. Jataainte caohacharelu, nejanoenihalu nii cachane,” nae jetao acaauru rai Jesoso.

<sup>22</sup>Nitohaneein lenonecuruhane ucuaetoha jetaote, faan mucuuriin Cana Coaunera bajaain, cataaun tacaain taturiin acaauru rai teein jetao:

“Nocoo caa quihuche. Caate cajabe-reoneein nenea ne,” naain jetao acaauru rai te Jesoso.

<sup>23</sup>Nii baiha, acaauru coconeein nenea bino curu mucuuriin, Cana Coaunera bajaain acaauru rai tihane jana jetaote, satiin ita rai leruune leruuneein cooruhane baiha jetao: <sup>24</sup>“Caa canaacha coite canu coichana ne. Acate arajii cachaauru osa coreniha nijiaonri-chaaanne coina Cana Coauneraacha icharatei ichacaanne jerichaaunne jaan cojunacaneein nenea ne. <sup>25</sup>Esinaae rauhijiriin nacooauneein caa baiha bino corihaaunni, Cana Coaunera Cojoanonaa necaohacha que neein ecu nenea bino cohanune reentiaain,” nae jetao aina nerelanacaauru rai Jesoso.

**Coitucuha nocoetelanaala nesuujuerichaaain Fedorone biha Jesosone**  
(Mt 26.30-35; Lc 22.31-34; Jn 13.36-38)

<sup>26</sup>Nitohaneein jetaote, salmo que nenatein Cana Coaunera coroaecuruhane baiha jetao aina nerelanacaauru aina jiniiquiin Olibo bichataneu cue Jesoso. <sup>27</sup>Inae ecu turuhin jetaote:

“Enene cojoanotiin cuhanete, satiin canu esenetaaichene jianein ita caje riaaneriquicheein. Nitohaneichene

coinate: ‘Carenerocuru beraicha sooruhane janate, cajihaneein riaaniha cuurureein carenerocuru,’ naain laenanohineein ne Cana Coaunera Quiricha inoensi cuhane. <sup>28</sup>Nena inae ichanacaanne, jaiti Calileea turusiquichene ajiniha, canu inara ichooaichaniha ecu niha cureeunni,” naa acaauru rai Jesosone jana jetaote: <sup>29</sup>“Satiin ii esenetaauruhane jianecuruhane nihana-tiin coatiha laen airinaunni canu,” naa Fedorone jana jetaote:

<sup>30</sup>“Esinae rauhijiriin enene cojoanotiin cuhanete, jaiti coroata saain ereniha ataoharine jana, canu coitucuha nocoetelanaala nichata saain nesuujia curiquiin,” naa Fedoro rai Jesosone jana jetaote: <sup>31</sup>“Ii aina jiniiquiin ateinanohi nihanune coina aitocuruhane nihana-tiin, coatiha nii ichoitucuha nocoetelanaala nesuujerihaaunni,” naa Jesoso rai Fedorone jana jetaote leeochoauru netonai jerichanetojoeein aitocure.

**Jetesemanii Cana Coaunera baja Jesosone**

(Mt 26.36-46; Lc 22.39-46)

<sup>32</sup>Nii baiha jetaote, Jetesemaniineein niicha curuaateuri cuhin, inae ecu turuuhane jana jetao:

“Cau nelauriaain canu cohacuchene, inara tonohanau Cana Coaunera bajani,” nae jetao aina nerelanacaauru rai Jesoso.

<sup>33</sup>Niritiin jetaote, Fedoro, Saantiaao, Joaan, naaonjoainuri amaain cuhin jetao, jataain inaderaain nererojoeae Jesoso.

<sup>34</sup>Nitohaneein nererojoeaain jetaote: “Jataain onaanajaanu rijitocojoaainte inaderae casuujua. Cau nedaauche inara. Jiaonriha siniichene. Nirijieein ichaaojoein canu cohacuche,” nae jetao acaauru rai Jesoso.

<sup>35-36</sup>Niritiin ratirinajaan acaauru caje nita cutiin jetaote, notoroaain atane que

nauri temetaain jetao: “Ofa, coatiha ii rai caaintajerihei caa necairichanaa tabai caje canu ichoteratena jereeine. Nena canu jerichaaunne rijijieein ichaaine jereneun, ii jereeine rijijieein ichaau,” naain jetao Cana Coaunera bajaee Jesoso. <sup>37</sup>Inae Cana Coaunera bajaane baiha, jelaiha acaauru coaraa cuhane jana jetaote, sinihuruhane jana erunajaa cue. Nii jaun jetaote: “Inaenchura siniite Simoon. Jataainachura aasaeriinijin sinirena abaantaain ichaaajoenaa naineneite. <sup>38</sup>Nabana osa que nesaruquichene coataa sinirena abaantaain ichaaojoein Cana Coaunera bajaache. Jataainte niqii inara suujua cuhane ainaa jeriquiche. Nete jataain abaantasine inara jaberoco,” nae jetao Fedoro rai Jesoso.

<sup>39</sup>Niritiin jetaote, nacoaauneein jelaiha cuhin jerichanetojoein Cana Coaunera bajaee cue. <sup>40</sup>Inae Cana Coaunera bajaane baiha, acaauru coaraa cuhane jana jetaote jataain siniitooruhane jaun, sinihuruha aina nerelanacaaurune jana erunajaa cue Jesoso. Nii jaun jetaote, nii tonaain tonoraauruhane jaanu coitucuurene. <sup>41</sup>Inae nichata saain jelaiha cuhane baiha nacoaauneein turuhin jetaote:

“Jaitinachura neloraain siniichete. Inae laen necha aansainein osaaonacaauru bijiu Cacha Calaoi nichaaune mucuhin teeuruhane rai nihane cojoinaca que tiha. <sup>42</sup>Chajaain nimichucuchete amuhacache. Inae tajiha nichuutaa canu belaihane saijieein canu colurujuera,” nae jetao aina nerelanacaauru rai Jesoso.

#### **Jesoso mucuhin amaauruhane**

*(Mt 26.47-56; Lc 22.47-53; Jn 18.2-11)*

<sup>43</sup>Niritiin jaiti ereerejiha aina nerelanacaauru aina Jesosone jana jetaote, sabere, enuha, naaonjoainuri que biji achunequiiin arajii cachaauru que corianeraain turuha cue nii Jesoso aina nerelanacaauru

lechoonca coroatajaneein nenea Jodasi. Acaauru letoaaauruhasaseredotecuru curuaanaacuru aina Moisesa aitoonjoan que cacha relaaurreaauru, Joriocuru bichauhenaauru, naaonjoainurine jaun. <sup>44</sup>Nitohaneein que nesujueein colurujeuin jetaote: “Nii quicha meri lioracaite acanereein. Chaen mucuhin caohatiin biji ichojoaain amaauche,” naain jetao amanajae Jodasi.

<sup>45</sup>Niritiin acaauru amaaain jetaote, inae rene turuhin rohan nichuutaain jetao:

“Cacha relaera,” naain jetao Jesoso meri lohite Jodasi. <sup>46</sup>Nitohaneein jetaote, Jesoso mucuhin amaaure.

<sup>47</sup>Nii jana jetaote, sabere mucuhaneechaneeriin leinjiin haseredotecuru curuaanaa cacha uricho beuhite, ecu acaauru aina nenea cacha. <sup>48</sup>Nii jana jetaote, nii mucuha cunacaauru cachaauru rai jetao: “Chanuna necha aansai asijauto mucuera tochaneein enuha, sabere, naaonjoain uhaain canu mucuha uhiche. <sup>49</sup>Itolere cojoanonaa banane inara jana Teenforo asaae neein cachaauru relanajacoon. Nii jana chabana canu mucunajaaohееeiche. Nete Quiricha inoaensi cuhane aitoha Cana Coaunerane nainaaichene coinata caa aache,” nae jetao nii mucuha cunacaauru cachaauru rai Jesoso.

<sup>50</sup>Nii jana jetaote, ecu jelai Jesoso ratiriin, satiiin soroore aina nerelanacaauru. <sup>51</sup>Nii jana leinjiin enamanaa jetaote, shojoera que shoheshohequiiin caaijie cuujihane jana jetao, acaen-tonai mucuuruhane jaun, <sup>52</sup>nii shojoera ratiriin machohequiiin cha colane soroe.

#### **Jorioocuru bichauhenaauru- niha chatohanaine rucuhaneein nenacaauru-**

*Junta Suprema acatiha niha Jesosone*

*(Mt 26.57-68; Lc 22.54-55, 63-71;*

*Jn 18.12-14, 19-24)*

<sup>53</sup>Nitohaneein haseredotecuru curuaanaacuru curuaana rene Jesoso

amaauruhane jana jetaote, satiin ecu netaojiaaure saseredotecuru curuaanaa-curu, Joriocuru bichauhenaauru, Moisesa aitoonjoan que cacha relaaure-raauru, naonjoainuri. <sup>54</sup>Nii jana jetaote, nita coarajeein caaijie cuuje Fedoro, saseredotecuru curuaanaacuru curuaanaa loreri chajeniha tiaajeein. Inae ecu turuhin jetaote, Teenforo beraaihurera aina nelauriaain usi que nichaatiha nedae.

<sup>55</sup>Nii jana jetaote, Jesoso sohin jaaoruhane jaanu lera airihure saseredotecuru curuaanaacuru, chaen satiin Joriocuru bichauhenaauru- *Junta Supremacuru*, naonjoainuri. Nejetaote, nii chatohaneein teuruhane jaanu lera eruurene, <sup>56</sup>nitohaneein nohanein colurujueuruha arajiin cachaaurune saijieein ita rijitjoeein aitocurenihane jaun. <sup>57</sup>Nii jana tabaauru jetaote, nimichuhin nechu jataain nohanein:

<sup>58</sup>“Canacaanu uricho quene aonacaan: ‘Caa cachaauruhacha ichai Teenforo itajeeinne, nichata janojoein cuhane leeocho ichana naineen cachaauruhacha ichanohinelaanaala,’ naane jana,” naain jetao colurujueure.

<sup>59</sup>Nejetaote, ita rijitjoeein cuaain colurujeeurenihane jaun esenetana nainecurene.

<sup>60</sup>Nii jana jetaote, satiin nii ecu nenacaauru cataaun nichaauraain jetao: “Chatohanaina ichaaite, toon toritiin icholuruhecuruhane jana tonoranajae-neein,” naain jetao Jesoso caje bajae saseredotecuru curuaanaacuru curaanaa. <sup>61</sup>Nejetaote, tonoraelanaala inauheneecha aonaje Jesoso. Nii jaun jetaote, nacoaauneein rai jetao:

“Iina itolere icharaanu que turuha uheni Cana Coanera Calaoi Mesihasi neei,” naain caje bajaa saseredotecuru curuaanaacuru curuaanaane jana jetaote: <sup>62</sup>“Ejeen, acaneeunchujanrana.

Inarate itolere ichana nainera neein nena Ofa raotono nichajai que lauhecohanune jana cacoarariquicheein. Chaen techu, inae ecu tihane bana dede caje, dede sacari jana uhin fauha uhanune jana canu coarariquicheein,” nae jetao rai Jesoso.

<sup>63</sup>Nii jaun jetaote, obaecane cojunacaneein cajione soaisoain jetao: <sup>64</sup>“Cha nenacaaneeina coara lateriquiche. Inara uricho quete, inae Cana Coanera Calaoihiniha nocoetiin irihane aonaquiche. Tonaquiche jana nii que,” naa acaauru rai saseredotecuru curuaanaacuru curuaanaane jana jetaote, satiin ita suujua rijitjoeein nii couluru-jeeuruhane ujuaaihonnein aca ohane coina aitocure.

<sup>65</sup>Nii jana tabaauru jetaote, coluneeinchuru nota conajaain bisiin jetao: “Aihane caa ii bisicha coitucuhin beeu,” naauruhane jana jetao, Teenforo beraichacurune maajeein nomeri faohacure.

#### **Jesoso coitucuha nocoeteniha Fedorone**

*(Mt 26.69-75; Lc 22.56-62;*

*Jn 18.15-18, 25-29)*

<sup>66-67</sup>Nii jana jetaote, loreri chajeniha usi que nichaatiha lauhecoha Fedorone coariin: “Ii netonaite Nasarete cocoaicha Jesoso aina amuhemuhena neei,” nae jetao Fedoro rene turuhin saseredotecuru curuaanaacuru curuaanaa coseenra.

<sup>68</sup>Nii jana jetaote: “Coatiha nii carai aitohine jaan cacha coitucuhaaun. Chaa que chaainti nii aitoi,” naain jetao neesuujue Fedoro. Niritiin jetaote, jelai caje amuhin acuujuaniha neeorihane jana, inae ere ataohari curuaanaa. <sup>69</sup>Nii jana jetaote, nacoaauneein Fedoro coaraain leeochoaauru rai jetao:

“Caa netonaite, nere tonoraeranein nena ne,” nae jetao nii coseenra, leeochoaauru rai.

<sup>70</sup>Nejetaote nacoaauneein nesuuje. Nii baiha neeorin jetaote, nacoaauneein Fedoro rai jetao:

“Rauhijiriinte bajiaa acaauru caje nena neei. Nii choae tacaain Calileea cocoaicha neei inatiin,” naaure jetao nii cuu nenacaauru.

<sup>71</sup>Nii jana jetaote: “Esinae rauhijiriin Cana Coaunerate coaraje, nii aitocoi-chene jaa cacha coitucuenihanune,”

<sup>72</sup>naa Fedorone rijieoritiin irihane coroata satiha ataoharine jana jetaote: “Jaiti coroata saain ereniha ataoharine ajnihate, cacoitucua nocoetelanaala nichata saain nesuujueriquin,” naalu rai Jesusone coacuhin jetao chanae Fedoro.

**Coberenadoro Filato  
acatiba niha Jesusone**

(Mt 27.1-2, 11-14; Lc 23.1-5; Jn 18.28-38)

**15** <sup>1</sup>Nii jana jetaote, jataain janohetiin netaojiaaure saseredotecuru curuaanaacuru aina Jorioocuru bichauhenaauru, Moisesa aitoonjoan que cacha relaaureraauru, chaen niha chatohanaine rucuhaneein nenacaauru- *Junta Supremacuru*, naaonjoainuri. Nitohanein jetaote, Jesoso biji ichojoaain amaaain Roma curuaanaacha letoai Jorionelanaala nena- coberenadoro Filato rai tiha cuure. <sup>2</sup>Inae nii Filato rene turuaauruhane jana jetaote:

“Iina Jorioocuru Curuaanaa *Rey* niha,” naa rai Filatone jana jetaote: “Ejeen. Esinae rauhijiriin acanichaanne quete aitoi,” nae jetao rai Jesoso.

<sup>3</sup>Nii jana saseredotecuru curuaanaacuru jetaote, jataain araai laurii itolere ichaain nihane que aitiin colurujeure.

<sup>4</sup>Nii jaun jetaote, nacoaauneein rai jetao: “Aonaun, jataain araai laurii itolere ichaain neeine que aitiinte icholuruhe-

cure. Chanuna jana tonaain acaauru tonoraeneei,” nae jetao rai Filato.

<sup>5</sup>Nejetaote, tonoraeniha Jesusone jaun: “Chatohanihane jaunna caa catoonraene,” nae suujua cuhane Filato.

**Ateinanohi niha Jesusone  
coina rucuhacuruhane**

(Mt 27.15-31; Lc 23.13-25; Jn 18.38-19.16)

<sup>6</sup>Nitohanein beseta bana nainein niha chuni colurujuenojoine jetaote, jerecuruha nii cachaaurune rijijieein jianenajaque Filato. <sup>7</sup>Nii jana jetaote, caresero cuhane ne leinjiin cacha Barabasinein niicha curuaateuri. Nii Barabaste leeochoauru aina acaauru curuaanaacuru que nejerateein sonajaain jaorera ne. <sup>8</sup>Nii jana jetaote Filato rene turuhin, nii beseta bana nainein ichanajaaocane rijijieein ichaa Filatone coina caje bajaure cachaauru. <sup>9</sup>Nii jaun jetaote, acaauru rai jetao:

“Aihane jaunna, inara Jorionequichene Curuaanaa *Rey* jianichaaunne jeriquiche,” nae jetao acaauru rai Filato, <sup>10</sup>saseredotecuru curuaanaa amurijiriin coitucuhin cachaauru relaa Jesusone jaun, arajii cachaauru esenetaain sacuuruhane jaun que necoelai caaun mucuhin rai teeuruhane que nainaane jaun. <sup>11</sup>Nejetaote, cachaauru suujuau tacaure saseredotecuru curuaanaacuru, Barabasi jianeratecuruhane coina. <sup>12</sup>Nii jana jetaote, acaauru rai jetao:

“Chatohanai jana ichacaanne jeriquiche caa Jorioocuru curuaanaa *Reynein* inaraacha curuaatei aina,” naain acaauru caje bajaa Filatone jana jetaote:

<sup>13</sup>“Coroso que teenene jerichaanura,” naauruha ehequiinne jaun jetaote:

<sup>14</sup>“Chatohanai baasonajian ichae,” naa acaauru rai Filatone jana jetaote, nacoaaunein ehequiin jetao:

“Coroso que teechaaura,” naaure cachaauru.



<sup>15</sup>Nii jaun jetaote cachaauru aina caohachaaain nenea jerihane jaun Barabasi jianein, Jesoso bisichatihane baiha acaauru rai te Filato, coroso que teuruhane coina.

<sup>16</sup>Nii jana jetaote, nii cocoainanacai loreri chajeniha Jesoso amaain, sondaro nejesinanejeein ecu satiin netaojiaaure. <sup>17</sup>Nitohanein netaojiaain jetaote, que cajione jichohajiojaai lanajai curujuaain, oja caje ichanohin comai lauriaaure coturi que. <sup>18</sup>Nii baiha jetaote:

“Acanein neeine Jorioocuru Curuaanaa *Rey*,” naaure jetao ehequiin nechu jataain cairichaa que nocoatijiaa.

<sup>19</sup>Niritiin jetaote, enuha que rai couturi faojoaain coulunecuruhane baiha, nechu jataain que ninichaaajia nacatiha neseonriaaure soondarooru.

<sup>20</sup>Nitohanein jataain que ninichaajeeuruhane baiha jetaote, nii cajione lanajai jichohajiojaai que niicha curuhacuri rocchin jetao, rai cajione esine curujuaain, jelai caje amaain coroso que tih cuure.

#### **Coroso que Jesoso teuruhane**

(Mt 27.32-44; Lc 23.26-43; Jn 19.17-27)

<sup>21</sup>Nii jana jetaote, ocoana caje caaujiha Alejaandoro, Rufo, naaonjoainuri inaca leinjiin cacha Sirene cocoaicha Simoonne jana coaraain jetao cotihacure, nii Jesoso teuruhane jaanu coroso amaane coina.

<sup>22</sup>Nitohanein jetaote, Golgotau Jesoso amaare. Golgota naane jetaote, “Niha couturi bejeronaa jaan,” naane aite. <sup>23</sup>Inaa ecu turuhin sacari mirra jujuaain nenea que jasiiteein bino que cocoaanaa jerecuruhane jana jetaote conaa jerene Jesoso. <sup>24</sup>Nitohanein cairichaaain jetaote coroso que teein, “Chariji raineincha nedarein,” naain que nocoatijiaain ecu nejesinajeein ita

rai Jesoso cajione chaluure soondarooru. <sup>25-26</sup>Janone nichae nuna macohi ichoae teejia enotone jana coroso que teein jetaote: Jorioocuru curuanaa niha nocoetohane jaunte, “Jorioocuru curuaanaa *Rey* ne,” naain que aitiin, laenanohineein nenea tabara teure coturiniha. <sup>27</sup>Chaen jetaote ecu aina corotajai asijiautooru teure coroso que, leinjiin raotono nichajaique, leeocho rai najaabiji nichajaique, naaonjoaain. <sup>28</sup>Nitohanein jetaote: “Necha ansai asijiautoorunein nenea rijijieeinte nereein,” naain laenanohineein niha Cana Coaunera Quiricha inoaensi cuhanene nainae.

<sup>29</sup>Nii jana jetaote, coturi rurujuaain:

“Ichalaraa. Chajaain aihane Teenforo itajeein nichata janojoin cuhane nacoaaunein michunaa jereeine rijijieein <sup>30</sup>ichaajenihane ijjabereeo ichoteratein coroso caje faau,” naain jetao Jesoso nocoeje chanuure satiin ecu situnacaauru.

<sup>31</sup>Saseredotecuru curuaanaacuru, Moisesa aitoonjoan que cacha relaaure-raauru, naaonjoainuri netonai jetaote:

“Leeochoauru ichoteratiha niqui, nete raajjenihane jaberoco ichoteratena nainene. <sup>32</sup>Chajaain aihane caa coroso caje fauhine Mesihasi- Isaraelitaauru curuaanaa *Reyte* coaraain esenetaacache,” naain jetao que ninichaajeeure nii Moisesa aitoonjoan que cacha relaaure-raauru. Nii ecu jiniichaaain coroso que nenacaauru netonai jetaotechu Jesoso nocoejechanuure.

#### **Oha Jesusone**

(Mt 27.45-56; Lc 23.44-49; Jn 19.28-30)

<sup>33</sup>Nii jana jetaote, enoto chujutora caje coaaunein nunuhetein nocohena ne satiin caa chauratane nuna macohi ichoae teejija sonanereentiaain. <sup>34</sup>Nii rijieeritiin jetaote, jataain tonijiaain jetao:

“Eloi, eloi, lema sabactani,” naane jetao: “Cana Coaunera cacorataaneun, chanuna catohanein canu nainatejeei,” naa jetao aite Jesoso.

<sup>35</sup>Nii jana nii ecunein aonajeerera tabaauru jetaote:

“Aonacuche *profeta* inoaensi Eliasi cotihacate aite,” naure jetao ita rai.

<sup>36</sup>Nii jaun jetaote, leinjiin acaauru caje nena cache jetao, jelhariin cuhin cajione que bino baaso elohanti sisiaain amaain jetao, Jesoso rai sijirichae jiarana njuvan macohi que tein cohane caina. “Coa rohecaachete aihane coroso caje fauha uha Eliasine coaracaache,” naain.

<sup>37</sup>Nii jana jetaote, jataain tonijiaain auhaquiin inae ohe Jesoso. <sup>38</sup>Nii jaun jetaote, ecui nichajai caje nunuhetein ecoai nichaae cuhin nesoaiheite nii Teenforo bujuatecuruhane jaan cajione. <sup>39</sup>Nii jana, ecu neein coarajiha Roma rai soondarooru curuaanaane jana niritiin oha Jesosone jaun jetaote:

“Esinae rauhijiriinte, Cana Coaunera Calaoheinecaihaa caa cachara,” naain jetao ecu coaraje.

<sup>40</sup>Chaen enecuru tabaauru jetaote, caje icharajeriin neein coarajeeruhane jana, ecu acaauru aina ne Maadala bene Mariha, chaen Jose ocoala Saantiaao neba Mariha, chaen Salomee, naaonjoainuri. <sup>41</sup>Nii ecu neein coarajeerera enecuru jetaote, aina cuhin Calileea niha Jesosone bana coroatajaneranein nenacaauru ne. Chaen jetaotechu, ecu neure arajiin leochaauru cachaauru, Jerosaleeun cuha Jesosone jana aina cunacaauru.

**Jesoso jaberoco rucuhacuruhane**  
(Mt 27.57-61; Lc 23.50-56; Jn 19.38-42)

<sup>42</sup>Inae nocoheca nebetacanaa cojoanona que janohane coinane jana, neruujeeuruha Jorioocurune jaa

cojoanona jana jetaote, <sup>43</sup>Filato coaraa cue Arimatea cocoaicha Jose, Jesoso jaberoco bajaane caina. Nii Josete Jorioocuru rai nelatein nenacaauru Jorioocuru bichauhenaauru- *Junta Supremacuru* caje jataain nelatein nenaane. Acaentonaite tururichaa in Cane Coaunera Cojoanonaane cohajein nelu. <sup>44</sup>Nii jaun jetaote, rene turuhin inae oha Jesosone que aithane jaun cojoelatohane jaun jetao soondarooru curuaanaa cotiharate Filato, esinae rauhijiriin ohane biha raine coitcuhane caina.

<sup>45</sup>Nii jana rene turuhin inae ohane bihane jaun jetaote Jose rai nii Jesoso jaberoco terate Filato. <sup>46</sup>Nii jaun jetaote, Jesoso jaberoco fauhin jataain cajione caohacha lino coreteein nii cajione que conajae Jose. Nitohanein conaacane baiha jetaote, ajeri jachu cuhane tein, rai bacuujuua fuhin ratiri ajeri jaberoco que. <sup>47</sup>Nii jana jetaote, ecu aina neein nii Jesoso jaberoco teeruhane jaa jelai coarajeure Maadala bene Mariha, chaen Jose neba Mariha, naaonjoainuri.

**O caje ichanaa Jesosone**  
(Mt 28.1-10; Lc 24.1-12; Jn 20.1-10)

**16** <sup>1-2</sup>Inae situha nebetacanaa cojoanonaane jana jetaote, semana nunuhe cojoanonaa tomiho bana jataain janohetiin enanejeein mituhajiha enotone jana jujuaihuru coreteein amaain, que Jesoso jaberoco jujuaa cuure Saantiaao neba Mariha, Maadala bene Mariha, Salomee, naaonjoainuri. <sup>3</sup>Nitohanein cuhin jetaote ita rai:

“Chana jana cana rai nii fueraneein nena ajeri elonare,” naain jetao niqui cuure.

<sup>4</sup>Nejetaote coaracuruhane jana, elonanohinein ne nii ajeri seenjoan fueraneein nena. <sup>5</sup>Nii jana nii ajeri jachu cuhane enooruhane jana jetaote, acaauru

raotono nichajai que lauhaca leinjiin enamanaa somajaain tarararoti que cajionecohine jana coaraain nesoonetoore nii enecuru. <sup>6</sup>Nejetaote, acaauru rai: “Coa nesoonetohache. Coroso que niicha teuri Nasarete cocoaicha Jesosona ariiche. Inae ichanaane jaun coatiha inae cau nihei. Nii teeuruhane jaan jelai coaracuche.

<sup>7</sup>Chajaain jelaiha cauhin, Fedoro, chaen aina nerelanacaauru, naonjoainuri rai: “Inae inara ajinihate Calileea cue Jesoso. Ucuuaete coariquicheein, inara rai aitoroaetohane rijijieeincha, nanichuche acaauru raicha,” nae jetao nii enecuru rai anjera.

<sup>8</sup>Nii jana jetaote, jataain nesoonetooruhane jaun chatatajaneein jelai caje sorohin, nii chuni rai belanaala inauheneecha neeure.

**Maadala bene Mariha rai ecooca Jesosone**  
(*Jn 20.11-18*)

<sup>9</sup>Inae semana cojoanonaa nunuhe bana ichanaane baiha jetaote, nii suujua cuhane caaunsini moconajaera letono siricha- niicha rautailu Maadala bene Mariha rene ococoe jauriaanejeein Jesoso. <sup>10</sup>Aca jetaote, chanaain inaderaauruha nii Jesoso aina nerelana-caaurune jana jetao, acaauru rene turuhin biha cue.

<sup>11</sup>Nitohaneein acaauru rene turuhin, jerichanejeein jaberoconeein ichaoha Jesosone coaraain biha cuha acaauru raine jana jetaote esenetaaurene.

**Coroatajai aina nerelanacaauru rai  
ococoa Jesosone**  
(*Lc 24.13-35*)

<sup>12</sup>Nii baiha jetaote, bero cuhane cuujeeuruha coroatajai aina nerelana-caaurune jana nejelauneein acaauru rai ococoe Jesoso. <sup>13</sup>Nitohaneein acaauru rai ocoocane coaraain, leochaauru rai biha cuuruhane jana jetaote, nii acaauru niha natiin esenetaaurene.

**Niicha cocoaainauri afosotooru rai,  
acaauruhacha ichaneni tiha Jesosone**  
(*Mt 28.16-20; Lc 24.36-49; Jn 20.19-23*)

<sup>14</sup>Nii baiha neoriin jetaote, lenoniha neeuruha nii lechoonca leinjiin aina nerelanacaaurune jana jetao, ecu acaauru rai ococohin, nii o caje ichanaane coaraain beeurera esenetana jerelanaala baasoneein rai suujua coaracuruhane caohate.

<sup>15</sup>Nii baiha jetaote: “Chajaain caa chauratane sacuritaain nenacaauru satiin cachaauru rai, nosa caje nichoteeururi-chaaine coina jitariin caa caitoonjoan beebenenichuche. <sup>16</sup>Caa caitoonjoan beechene jana esenetaain acauhanau teein nebaotisaerateite nichotiha cureein. Jana caa caitoonjoan beechene jana esenetana jeriheichurute caseteco coaraa cuurureein. <sup>17</sup>Canu esenetaain canu ere tonoraain neeichenete canu neein nena rijijieein moconajaera letonocuru sitaain, nejelauneeichuru nereeuru cuhane ereein, <sup>18</sup>acano niha natiin mucunaa nainein, naonjoaain, corianiha natiin coichene nii chatohaneein baasoneein inara tenereein. Nii choae tacaain techu, cunaitenacaauru mucuhichene nerautaa cuurureein,” nae jetao niicha cocoaainauri rai Jesoso.

**Dedeeu cuha Jesosone**  
(*Lc 24.50-53*)

<sup>19</sup>Niritiin niicha cocoaainauri afosotooru rai irihane baiha jetaote, dedeeu iniin rai Inaca Cana Coaunera raotono nichajai que nelauriaa cuelu Cana Curuaanaa Jesoso. <sup>20</sup>Nii jaun jetaote, satiin chauratane sacuritaain amuhemujeein nosa caje nichoteeururi-chaaine beebijiha cuuruhane jana jetao, nii acaauruhacha beebijiha esenetana nainecuruha cachaaurune coina acaauru aina cuaain cojoelanaacojoai ichae Cana Coaunera.